

**SEVENTH LEGISLATIVE ASSEMBLY OF MIZORAM
(SEVENTH SESSION)**

LIST OF BUSINESS

FOR FIFTH SITTING ON MONDAY, THE 12th OCTOBER, 2015
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **Pu LALRINMAWIA RALTE**, Minister to lay on the Table of the House a copy each of the following :

- i) The Payment of Gratuity (Mizoram) Rules, 2015.
- ii) The Mizoram Building and Other Construction Workers (Regulation of Employment and Conditions of Services) Rules, 2015.
- iii) The Mizoram Maternity Benefit Rules, 2014.
- iv) The Mizoram Industrial Disputes Rules, 2015.

FINANCIAL BUSINESS

**GENERAL DISCUSSION ON THE BUDGET FOR THE YEAR
2015-2016.**

3. General Discussion on the Budget for the year 2015-2016 (to commence)

NGURTHANZUALA
Secretary

SPEAKER : ‘Nimahsela, thim ata chhuaka, a eng mak taka lut tura kotu che u thatna chu in entir theih nan, nangni zawng chi thlan, lal puithiamho, hnam thianglim, Pathian mite ngei in ni si a; Hmanlai khan mi reng in ni lo va, tunah erawh chuan Pathian mi in ni ta a; hmanlai khan zahngaihna in hmu lo va, tunah erawh chuan zahngaihna in hmu ta.’

(I Petera 2:9 & 10)

Zawhna kan la leh ang a, kan tih thin ang khan zawhna neituin supplementary kha a zawt ang a. Chumi hnuah minister-in a chhan tawh hnuah zawhbelhna dang member pahnihin an siam ang a. Chu chu a ruala chhan a ni dawn a ni tih kha hre reng ila, zawhna tam zawk kan laktheih nan.

Tunah hian Starred Question No.53 zawt turin a neitu Pu Lalruatkima, MLA zahawm tak ilo sawm ang.

Pu LALRUATKIMA : Pu Speaker, ka lawm e. Ka Starred Question no.53, Trade & Commerce Department changtu Minister zahawm tak chhan atan :

- a) MAMCO hi thiah tum a ni em? Anih chuan engvanga thiah tur nge a nih?
- b) MAMCO hian loan/leiba a nei em? A neih chuan engzat nge loan/leiba a neih?
- c) MAMCO thawktute awm zel dan tur eng angin nge ruahman a nih?

*Speech not corrected.

SPEAKER : Department neitu Minister zahawm tak zawhna chhang turin ilo sawm ang.

Pu H.ROHLUNA, MINISTER : Pu Speaker, member zahawm tak Pu Lalruatkima zawhna Starred Question No.53-na (a) na chhan na chu thiah tum a ni. Deloitte & Touche Consulting India Pvt. Ltd chu Mizoram sawrkar in a hnuai PSE te restructuring chungchang zirchiang turin a ruai a. An rawtna angin MAMCO hi thiah tum ani. Loan ba a nei lova, leiba ₹ 68, 06,18/- a nei mek a ni. MAMCO thawktute awm zel dan tur eng angin nge ruahman a nih tih chhanna chu Mizoram State Public Sector Enterprises Early Retirement Rules (ERR) 2015 angin thawktute option siam tir an ni a, hemi scheme avail duh lote chu ‘Special Scheme for Recruitment of Employees of the Closed Public Sector Enterprises Under the Government of Mizoram’ angin kalpui tum a ni.

SPEAKER : Zawhbelhna, a neitu Pu Lalruatkima.

Pu LALRUATKIMA : Pu Speaker, ka lawm e. Hei PSE ho restructuring ti tur te kan Finance minister zahawm tak budget speech-ah khan kan hmu a. Chutah chuan Special Scheme for Appointment of Employees tih OM hi ni sawmthumah tihchhuah a ni a. Chuan September thlaah deuh vek hianin thil hriattirna chi hrang hrang te kha Finance Department atang pawhin tihchhuah a

ni a, hun a chep khawp mai a thawktute tan. Chutah chuan ka zawhbelhna chu, Group A atan ERR-ah option tur tarlan a ni ve silo a, engtin nge Group A hi in tih dawn?

Pahnihnaah ERR-a chhuak turte tan zirtirtu VRS-a chhuak te ang khan hun rei tak sawrkarin sum leh pai a bat sak leh angem? Rules-ah khan technical problem a awm a nih chuan ni 90 chhungin cheng ₹ 1 lakh pek tur a ni ang tih a ni a. Chuti a nih chuan pek kha in tum lo ami tihkha ka zawhbelhna ni sela.

Tin, ERR-a chhuak tur ten an option turah pension leh an chhuahpui tur zat kha tun thlengin chhut fel ala awm si lova, anni tan pawn an pension benefit kha enge anih an hriat si loh avangin kan chhutchhuah sak thei tawh em tih kha ka zawhbelh duh a.

Tin, a tawp bera ka sawibelh duh chu NLUP kan ti a, cheng vaibelchhe tam takin hma kan la a, chumi chuan tharchhuah hlawkna te pawh a nei tawh ang a Pu Speaker. Khatah khan NLUP marketing lam buaipui tur te pawh khan MAMCO te hi an tangkai dawn lawm ni? Amaherawhchu thiah kan tum leh si a, khata tan khan kan mamawh lo ami tih kha ka zawhbelhna a ni e.

*Speech not corrected.

SPEAKER : Zawhbelh na zawt law law se Minister khan a chhang mai dawn nia vawikhat ah, Er. Lalrinawma.

Er. LALRINAWMA : Pu Speaker, ka lawm e. MAMCO-te hian project khawih lai an nei niin ka hria a, tun dinhmun ah engzat nge an khawih tih leh a pumpui thu in engzat man nge tih kha ka zawhna ni ta se. Pahnihna ah chuan, heng project an khawih te hi tih tawp an lo nih dawn tak si chuan engtia kalpui zel nge an tum tih kha ka zawhbelh na a ni e. Ka lawm e.

SPEAKER : Pu Vena

Pu R. VANLALVENA : Pu Speaker, ka lawm e. Deloitte recommendation kha engtik kum a recommend nge, engtik kum a rawih nge tih kha ka zawt e.

SPEAKER : A pathum khan a chhang ang a, zawhbelh na a awm thei tawh lovang. Minister zahawm tak i sawm ang.

Pu H. ROHLUNA, MINISTER : Pu Speaker, a zawhna neitu member zahawm tak Pu Lalruatkima zawhbelhna Group A chungchangah hian ngaihtuah mek a ni a, hei hi tih fel ala ni chiah lo niin ka hria a. Tin, ERR option tute bat rei sak chungchang erawh hi chu hmalak tan chauh a ni a, enge a kalphung zel tur sum awmdan a zirin sawrkarin a ngaihtuah zel tur a ni ang a.

Tin, an benefit chungchang chhut fel loh tih hi chhut fel chiah chu ala nilo maithei a, helai detail chiah hi Pu Speaker kei pawh ka chiang chiah lo tun dinhmunah hi chuan, chhut fel leh fel loh.

Tin, NLUP tharchhuah a hma la turin MAMCO hi mamawh a ni lo em ni tih chungchang chu NLUP atangin thil tharchhuah mek zel a ni a. He corporation hi zirchian a an dinhmun te han en zel hian a zirchiangtu ten restructuring han tih a thil dang han tih ai chuan thiah phawt mai ni se tih rawtna a awm avangin chumi ang zulzui chuan kalpui zawk a ni ta a ni. Tichuan, Pu Rinawma member zahawm tak zawhbelh na construction works hi MAMCO hian hmun hrang hrang ah a lo kalpui a, pakhatna ah chuan Construction of Jawahar Navodaya Vidyalaya (JNV) School Khawzawlah an thawk a.

Tin, JNV School tho Mamit-ah, hei hi HRD ministry hnuai ami a ni a, tunah hian Lunglei KVS-ah Ministry of Human Resource Development, Government of India hnuai ah tho hian thawk turin a in buatsaih a, A.A. pawh a awm tawh bawk a ni. Zawhbelhna pakhat kha ka lo chhinchhiah hman chiah lo va Pu Speaker.

Er. LALRINAWMA : Pu Speaker, a pumpui thu-ah engzat man nge an thawh tih leh heng an hna kal lai mek hi hetiang a tih tawp an lo nih dawn tak si ah chuan engtia kal tir zel nge an tum tih a ni e.

Pu H. ROHLUNA, MINISTER : Pu Speaker, a pumpui thu a an hnathawh zawng hi belh khawm vek a ngai ang a, ti mai chuan ka chhang thei lo.

Tin, member zahawm tak Pu Vena zawhbelhna kha Deloitte & Touche Consulting India Pvt. Ltd.-in zirchianna nei tura an rawih tan kum chiah kha kum engemaw zat a liam tawh a, ka chiang chiah lova ka chhang thei mai lo.

Er. LALRINAWMA : Pu Speaker, min la chhang kim lo deuh hlek a khawngaih, eng angin nge heng an construction work an khawih ho project ho an kalpui mek hi tih tawp an lo nih dawn tak si-ah chuan eng tianga kalpui nge an tum tih kha Pu Speaker, min la chhanglo a nia.

SPEAKER : “Ka chhang theilo” a tih zingah khan a tel lo maw ?

Pu LALRINLIANA SAILO : Pu Speaker, ka la zawt belh thei em le ?

SPEAKER : Ngawi rawh zawhbelhna kha chu a awm thei tawh lo. Tun a mi erawh kha chu fiahlo thil

Pu LALRINLIANA SAILO : Anih point of clarification ka siam thei em ? Point of clarification chu a theihin ka hria, danin a phalin ka hria

SPEAKER : Thei tawh lo.

Pu H. ROHLUNA, MINISTER : Pu Speaker, khang construction work an la zawh loh te kalpui dan tur kha chu la ngaihtuah zui tur ni turah ka ngai.

Pu LAL THANHAWLA, CHIEF MINISTER : Pu Speaker, kan Public Sector Undertakings te hi sick units vek an ni a, sorkar hmasa lampang atang pawhin buaipui tawh an ni. Tin, CAG Report reng reng hian tihtawp hi a recommend deuh zel a, amaherawhchu alternative zawn a harsa a, sum harsatna avang te in. Tin, employees te chungchang ngaihtuah a ngai a, pawng thlawn tir mai theih chi an ni lova, sorkar-in kawng hrang hrang a dap a, Early Retirement Rules (ERR) te leh golden handshake ang zawng te in engtinng e kan tih ang tih te an ngaihtuah a, chutiang chuan cabinet hian tih tawp zai a rel hlawm a ni.

MIFCO erawh hi chu private sector-ah pek turin tihfel ti tih a ni tawh a, tun ai hian anmahni pawh an hlim zawkin sorkar pawhin a chhawr tangkai zawkin kan hotuten an ring a.

Tin, MAMCO te pawh hi a tul chuan construction company ang te pawhin leh a tul ang em ; tin profit earning a ni zawk ang em tih te sorkar-in a ngaihtuah ang a. Engpawh nise, tibo tura recommendation hi kan hmuhna a rei tawh a sorkar hian, kan sorkar hma te pawhin CAG Report-ah a awm vek a. Chuvangin, liability inpek belhchhoh zel hi sorkar kalphung tura a hriat loh avangin Council of Ministers in tih tawp turin a ngaihtuah a ni. Amaherawhchu, a thawktute chungchang hi uluk taka ngaihtuah a ngaih avangin tunah hian tih tawp tura a relna thla engemaw zat kal tawh mahse employees te chungchang, an mai par thlawn tawp lohna dan, nakin zel a an awmdan tur te ngaihtuah a ngai a, khatianga Early Retirement Rules (ERR) han siam hnu pawh khan anmahni zingah pawh hian engemaw zat chu khami duh zawk option rawn pe tawh te tam tak an awm nghe nghe a, sorkar-in a la ching fello mai zawk a ni a.

Tin, tunah hian ZENICS te pawh hi kan la mamawh zel em tih uluk taka ngaihtuah a ngai a. Hengte hi ICT department kan neih hma ami an ni tawh a, tunah ICT department-te kan lo neih tawh hnu hian, kan la mamawh em tiin kan mithiamten uluk takin an ngaihtuah a, chutianga decision siam chu a ni.

Tin, corporation thenkhat chuan “sum kan la lut tan ve chauh a, kan tha ve dawn chauh a” an rawn ti a. Mahse, an sum lakluhna hi sorkar-in liability an ni reng mai

a, engemaw zat earning an lo siam ve theih nan, tiin an mahni line nilo, Zu te an zawrh tir vang a ni. Chuvangin, sorkar decision hi a la ding reng a, mahse employees-te tana tha ber tur hi engtia kalpui tur nge ni ang ti a an ngaihtuah avang hian an la tawp lo mai a ni.

Tin, MAMCO hnathawh te hi chu a tul chuan an tih zawh hun kan nghah tir thei a; tin, a tul chuan PWD kan nei a, chung chu an take over thei a. Tin, a tul chuan construction corporation-ah pawh sorkar-in a let thei mai a ni.

SPEAKER : Awle, zawhna No. 54-naah kal ila, zawhna neitu MLA zahawm tak Pu R.L. Pianmawia zawt turin i sawm ang.

Pu R.L. PIANMAWIA : Pu Speaker, ka lawm e. Ka zawhna Starred Question No. 54-na, Social Welfare Department changtu Minister zahawm tak chhan atan - Anganwadi In chhia thawmthat emaw sak thatna tur sum hmuh a ni em ?

SPEAKER : Minister zahawm tak Pu P.C. Lalthanliana chhang turin i sawm ang.

Pu P.C. LALTHANLIANA, MINISTER : Pu Speaker, MLA zahawm tak Pu R.L. Pianmawia zawhna chhanna chu - Kum 2014-2015 atan Government of India, Ministry of Tribal Affairs atangin Anganwadi Centre 50(sawmnga) renovation atan ₹ 225 lakh hmuh a ni.

*Speech not corrected.

SPEAKER : Awle, zawhbelhna. A neitu kan sawm ang a, chu lo chu midang pahnihin in zawhbelh leh thei.

Pu P.L. PIANMAWIA : Pu Speaker, ka zawhbelhna chu - Sak thatna tur sum kha tunah khan a sawi tel lovin ka hria a, a thar sakna tur kha a awm tel thei em ?

SPEAKER : Zawhbelhna dang a awm loh chuan a chhang turin Minister zahawm tak sawm ila.

Pu P.C. LALTHANLIANA, MINISTER : Pu Speaker, Anganwadi Centre hi Central-in min pek hian a thar sakna hi chu min pe tel thin a. Amaherawhchu, a Centre hawna tura permission min pek rualin heng a sakna hi a lokal mai lova; Anganwadi centre hawn thar engemaw zat sak loh kan la nei a, chung chu Child Welfare Ministry atangin a sakna hi pakhat tan ₹ 4.50 lakh kan hmu dawn a. Tunah hian 60(sawmruk) atan minrawn pe tawh a. Chung 60 (sawmruk) a thar, kan hawn tawh si sak tur te chu thlan fel mek a ni a.

Tin, Pu Speaker, kan sawibelh duh chu Anganwadi Centre repair-na emaw sak thatna tur ang chi hi a awm ngailo hrim hrim a. Chuvang chuan, Anganwadi te hi khawtlang nu leh pa ten an enkawl thin a ni a, a chhia thawm that ngai tam tak Mizoram-ah a awm a. Tunah hian Anganwadi centre 2244 kan nei a, renovation a kan dil hi pakhat sakna atana ₹ 4.50 hisapa centre 50 (sawmnga) atana min pek chu. Nimahsela a sak thatna a thar ang hi kan hmuh tho avangin ram pum huapa repair ngai zawng zawngte CDPO Project tinah khawtlang hruaitute nen en a,rawn thehluta he ₹ 225 lakhs hmang hian a tul zualpui hi chu Zoram pumah kan thawm that a, kan siam that theih kan ring bawka a ni tih kha House member zahawm takte hriat zauna atan, bial theuh-ah khatiang kha an neih ka ring a ka'n sawibelh a ni e.

*Speech not corrected.

SPEAKER : Awle, zawhna No. 55-na neitu Dr. K. Beichhua MLA zahawm tak sawm ila zawt turin.

Dr. K. BEICHHUA : Pu Speaker, ka lawm e. Minister zahawm tak Fisheries Department changtu hnena ka zawhna chu -

- (a) Fisheries Department-in a Serlui Tuikhuah a Cage Culture a siam ang hi Mizoram hmun dangah siam tum a hmalakna a awm em ?
- (b) Awm ta se, khawi hmunah te nge ni ang ?

SPEAKER : Awle, a changtu Minister zahawm tak chhang turin i sawm ang.

Pu B.D. CHAKMA, MINISTER : Pu Speaker, MLA zahawm tak Dr. K. Beichhua zawhna chhanna chu -

- (a) Fisheries Department-in a Serlui Tuikhuah a Cage Culture a siam ang hi hmun dangah siam tum a hmalakna a awm.
- (b) Teirei (Mamit Reserve a ni a) Palak leh Tamdil-ah te siam tum a ni.

*Speech not corrected.

SPEAKER : Zawhbelhna

Dr. K. BEICHHUA : A lawmawm e, Pu Speaker, Serlui tuikhuah Cage Culture atang khuan sorkarin sangha engzat man chiah nge a hralhchhuah tawh tih kha ka zawhbelhna a ni e.

SPEAKER : Zawhbelhna dang a awm chuan midang 2, Awle, Pu Ruatkima.

Pu LALRUATKIMA : Pu Speaker, July ni 27-a tualchhung chanchinbua, NLUP hnuaiia Sangha chi supply dan diklo nia sawi kha a dik reng em? Dik ni ta se Chief Minister in a sawi ang khan ACB te kha chhuitir an ni ta em? tih kha kan zawhbelh a ni e.

*Speech not corrected.

SPEAKER : A dang a awm loh chuan Minister in a 2 khan a chhang kawp ang a, a bak a awm tawh lo vang.

Pu B.D. CHAKMA, MINISTER : Pu Speaker, zawhbelhna 1-na chhanna chu - Sangha quantity hi Serlui Cage Culture atangin engzahnge hralhchhuah tih kha chu cage 48 kan nei a, a hmasaber first harvesting ah hian production chu quintal 330 a ni a. Tin, second ah hian quintal 210 a ni. First instalment ah revenue kan hmuhdan chu ₹ 28 lakhs a ni a, ₹ 28 lakhs atangin PPP mode in kan kal thin a. Local Area made 50% leh Fisheries Department 50% a total sale proceed atangin kan lo la thin a ni a. First phase ah hian kan department tan nuai ₹ 14 lakhs revenue hi kan hmu a. Tin, second ah hian a total chu cheng nuai ₹ 20 lakhs department atang hian nuai 10 a ni a, a dang nuai 10 kha chu Builum mite tan 50% profit chu anmahni kutah a awm a ni.

Tin, zawhbelhna kan MLA zahawmtak Pu Lalruatkima zawhna July 2015 a ACB cage chungchangah hian kan Chief Minister zahawmtak hnenah lawmthu ka sawi a ni. Hetiang suspicious, tunthlengin Fisheries hnuaiiah hian in mimal in Dan an siamthiam loh avangin thil diklo hi a awm em ni aw an ti zel a. Question tam takte, zawhna tam takte tunthlengin department ah hian a rawnlut thin a, mahse, hei chu a dik nge diklo tih hi chu kan Chief Minister zahawmtakin ACB kutah a awm kha chu a lawmawm ka ti lutuk, dik lo pawh nise. Tunah chuan ACB hnuaiiah under investigation a ni a, a diklo a nih chuan hrem ve tur a ni. Ka lawm e.

*Speech not corrected.

Pu LALRUATKIMA : Pu Speaker, point 1 chiah, (SPEAKER : A awm tawh lo e, point dang chu, i zawhna sa-ah khan chhan loh a awm a nih chuan thudang ni se) Builum kha PPP mode kha a awm tawh silo a, sawnchhuah vek tura tih kha a ni si a, wawiin thlengin sawnchhuah loh an ti ta em ni? PPP mode-ah khan hlawkna an la tel tih kha, engnge a awmzia ni ta. Sawnchhuahna turin compensation pawh pek vek an ni bawk si a.

*Speech not corrected.

SPEAKER : I chhang thei mai em?

Pu B.D. CHAKMA, MINISTER : Pu Speaker, zawhbelhna kha an chhuah tur kha keimahni Fisheries lam atangin a ni lova, kha kha chu Fisheries leh anmahni lam inremsiam angin PPP mode kha chu thu pawimawh zawk a ni tih chauh ka hria. Ka lawm e.

*Speech not corrected.

SPEAKER : Zawhna dang, 56-naah kan kal ang a. A zawhna neitu Dr. K. Beichhua, MLA zahawm takin zawt sela.

Dr. K. BEICHHUA : Pu Speaker, ka lawm e. Minister zahawm tak Urban Development & Poverty Alleviation Department changtu hnena ka zawhna chu –

- a) Zodin cinema hall hlui building hi motor parking siam nana lei tumna a awm em ?
- b) Awm ta se cheng engzat man nge ni ang ?
- c) Tunge he building neitu hi ?

SPEAKER : Awle, a department neitu Minister zahawmtak chhang turin i lo sawm ang.

Pu ZODINTLUANGA, MINISTER : Pu Speaker, kan Member zahawm tak Dr. K. Beichhua a Starred Question No. 56-na chhanna chu –

- a) Awm e
- b) ₹ 1000 lakhs (cheng nuai sangkhat) man a ni.
- c) S.T. Khama, Electric Veng, Aizawl a ni e, ka lawm e.

SPEAKER : Zawhbelhna a awm em ?

Dr. K. BEICHHUA : Pu Speaker, Zoram in sum kan neih loh zia nasa takin kan sawi a, khatah khan ₹ 1000 lakhs kha chu a tam tham viau in ka hria a, dawn hniam tumna a awm em tih kha ka zawhna 1-na ni ta se. 2-na ah chuan parking ngawr ngawr atan nge ni, thildang atana hman tumna a awm em tih kha ka zawhbelhna a ni e.

SPEAKER : Zawhbelhna dang a awm em ? Pu Vena.

Pu VANLALVENA : Pu Speaker, ka lawm e. Kan Minister zahawm tak ka zawhbelhna chu - in hmun lei tur hian tutenge palai atana kal tih ka zawt e?

SPEAKER : A dang a awm em ? Awle, Col. Z.S. Zuala.

Lt.Col. Z.S. ZUALA : Hemi kan leia kan sakna atang hian engemaw sorkar lampangin revenue hmuhtueihna tur ruahmanna a awm em tih kha ka zawt e.

SPEAKER : A pathum khan Minister zahawm takin chhang sela. A dang kha a awm thei tawhlo tih kha hria ila.

Pu ZODINTLUANGA, MINISTER : Pu Speaker, zawhna neitu member zahawm takin a rawn zawhna kha sorkar in Aizawl khawpui chhung a tawt a, khawpui ah engtinng hmalakna turte ngaihtuahna a seng a. Chungah chuan sawlai Zodin Cinema Hall saw hralh theih a ni tih thawm kha kan lo hria a. Chutah chuan consultative committee te kan thu a, kan member zahawmtak zawhna neitu Pu K. Beichhua pawh kha a tel ve a. Hengte hi sorkar hian dawr ve ta ila, kan ramah, nakin zelah private kuta a luh chuan a tha lo zawk ang, sorkarin nei theih ta sela chuan tiin August ni 5, 2015 khan kan minute ta a. Chutah chuan hmalain kan hotute hnenah te a tulzia kan sawi a, hman tangkaina tur chu thil tam tak a awm a. Amaherawhchu, a hmun hi neih phawt loh chuan eng hi nge tha ber ang tih hi a la hriat mai theih loh a.

Tuna han ngaihtuah maiah chuan Aizawl Lammualah te tihkhawm tam tak a awm thin a. Tin, a bul lawkah Mizorama kan Bank lianber State Bank te a awm a. Tin, Solomon Cave, kan indoor market ti mai ang, sumdawwna lian tak tak te a awm a. Chung zawng zawng mipui pan khawmna bul a lo ni a. Hengah te hian parking hi chhawng 4, chhawng 5 ten siam ta ila, Aizawl khawpui chepna tam tak te hi a puhruk thei ang a. Tin, Parking atangin sum tamtak a rawn lut ang a tih te ngaihtuahnaah a awm a.

Tin, chumi piahlamah a chung lampang hi hman tangkaina tam tak, office building-ah emaw, shopping complex- ah emaw, Aizawl khawpui cheimawina tur atan tih kha sorkarin a ngaihtuah a ni a. Chutiang tur chuan kan hotuten theihtawp an chhuah a, a dawn pawh an indawn nasa.

Kan member zahawm tak Pu Vena zawhnaah khan hei kan zinga kan senior member te, kan Home Minister te, kan senior member Pu K. Sangthuama te, kan Home Ministerte'n theihtawp an chhuah a. A neitu hi mimala an lo hmelhriat avangin, kan hriat dan phei chuan market-ah phei chuan cheng vaibelchhe 13 in an zuar an ti a, annin ram tan tiin a hniamthei ang bera nawrin Vaibelchhe 10 hian an innawr tlu a ni. Tunah hian department lam pawn lei phalna turin hma kan la mek a. Vawinah Land Acquisition Act te hmanlai kan neih loh avangin Revenue atangin negotiation (a lei phalna tur) permission te kan hmu tawh a. Tunah hian a pass hi hming thlak loh a la nih avangin, hming thlak veleh a lei thei turin sorkar chu kan in puahchah tawh a ni tih khan ka chhangkimin ka hria a. (**SPEAKER :** Pu Z.S. Zuala zawhna chungchang kha) Nichin khan a revenue chungchang kha ka rawn chhang nghal a. Parking atan te leh sum tam tak hmuh theihna tur

a nih bakah kan ram, Aizawl khawpuiina sawlai hmun chep tak Vanapa Hall te, Solomon's Cave te, State Bank te leh Lammual, mipui punkhawmna hmun hliir a ni a, sawnga mipui pungkawmte khawpui tibuai tawh lova parking te pawh awm theih kan beisei a ni. Ka lawm e.

SPEAKER : A lawmawm e. Zawhna dangah kan kal thei ta e.

Pu LAL THANHAWLA, CHIEF MINISTER : Pu Speaker, ka ding hmasa zawk member zahawm tak Pu K. Sangthuama aiin. Pu Speaker, helai hmun hi a to emaw to lo emaw lam kha kan ngaihtuah lo va, mipui leh ramin a mawmawh lampang kha kan hotute ngaihtuahna zawk a ni. Lei a tha mang e aw he hmun hi, tihian a awm chul rup reng a tia ngaihtuah laiin an lo hralh hman tih kan hria a, a neituten. Tichuan, bawhzui reng kan hotuten an tum laiin mitthi ralnaah hei, kan Finance Minister zahawm tak Pu Lalsawta te, vanneihthlak takin Pu K. Sangthuama te an awm a, kan han sawikhawm a, tha kan lo ti viau mai a. Mahselangin, Mizo pawh ni lem loten lei an tum niawm tak tea hriatna kan neih avangin kan hmanhmawh ta a. Chutiang chuan hmanhmawh takin a neitute zawn chhuah niin tunah hian kan han dawn a, kan dawn hniam theihna ber chu vaibelchhe sawm hi a ni ta a ni. Chu chu vannneihthlak takin member zahawm tak Pu K. Sangthuama te pawh hian thil tha a nih avangin min han phurpui te hi kan lawm tak zet a, lungualna tha tak kan nei hi tha kan ti a.

Tin, motor parking atan ringawt a nih ka ring lo va, kan hotute ngaihtuahnaah chuan. Mithiamten an en ang a, architech fel tak takte kan nei a, multi-purpose a hman te pawh kan duh a. Entirman, Vanapa Hall hi a rim em em a, a hlui tawh zia leh lehlamah phei chuan a zahpuiawm tawh mah mah a. Han chei that dawn pawhin a thar sakna tluk deuh thaw sen a ngai dawn a ni an ti a mithiamten. Chuvangin, auditorium tha tak te pawh kan nei thei mahna parking engemaw zat piah lamah, tin, shopping mall te pawh kan la mamawh zel a tih te a ni.

Saw tuna Millenium an tih tak saw Pu Speaker, kan hun hmasa lamah khan a hnuaiah sawn motor parking a awm nan tiin lei te pawh kan lai a. Tin, ground level saw thlai thar, mahni thlai tharten thianghlim taka phai lamah te an zawrh thin anga zawrh tirna tura ruahman a ni a. A floor pakhatna emaw saw shopping arcade tlem a awm ang a. Tin, hemi Bazar Bungkawn chep lutuk, tin, dawr, kawngpui pahnih inkar a sawmpathumna/sawmpangana vel thleng sawn chulai shopping arcade-ah chuan rehabilitate a ni ang a. Tin, Pu Shillonga in he lampang zawng saw, New Market-ah rehabilitate an ni ang a, sawlai saw Temple Square mawi nuam taka kan siam ang hian kan siam leh ang tiin kan hotuten an ngaihtuah a. Chutiang chuan hma an la a. Tin, a chungah state of the art auditorium te, state library te, cafetaria mawihnai tak te awm turin ruahmanna an siam a. Mithiamten nalh takin an draw a ni mipui vantlang tan. Tichuan, kan Governor PR Kyndiah khan a foundation stone a lay a, contractor pawh thlangin vaibelchhe hnih lai sen hman tawh a ni. Mipui vantlang tan liau liau tih a ni a.

Amaherawhchu, kan tlak hnu khan sorkar tharin a cancel a, tunah chuan mihausa in atan an siam ta saw pawh kan ti a, a uihawm pawh kan ti a. Chuvangin, helaiiah hian mipui vantlang tana hamthatna tur awm se tih hi kan hotute ngaihtuahna a ni a. Chuvangin, a man vaibelchhe sawm kha chu tun atanga kum nga, an sak zawh hnuah an hawn atanga kum hnih khat chhung lekin a recover vek ang tih hi kan chiangin kan hria a. Tin, chutianga a lo recover lo a nih pawhin public convenience atana kawng tinrengah a han awm tur kha kan hotute zuk ngaihtuahna zawk a ni. Parking pawh a awm ang a, shopping arcade te pawh a awm thei ang a, state of the art auditorium te pawh awm thei turin kan hotuten an beisei a ni.

SPEAKER : Pu K. Sangthuama hi zawhbelhna a ni lo vang, chhan..

Pu K. SANGTHUAMA : Pu Speaker, tawi te khawngaiha sawi min phalsak avangin ka lawm e. Sawlai saw kan sorkar lai pawh khan keima tih tihin Patea hian a phal lawm maw ni chu aw, hei hi sorkarin nei ta ila thil tangkai takah a hman theih ang a tiin rei tak ka lo ngaihtuah ve tawh a, sawtilai saw. Amaherawhchu, sum leh pai duh ang te a awm loh bawk avang khan a tih mai theih loh a.

Tichuan, hmanni khawhar inah kan Chief Minister zahawm tak te, kan Finance Minister te nen kan inhmu khiah mai a. ‘Sawlai saw miin lei an tumin ka hria a, hmun dang daih atang te, phai lam atang tein an rawn sawi a. Chuvangin, sawlai saw hman tangkai dan te ngaihtuah ula sum in neih chuan lei hi a tha lawm ni. Motor za atanga zanga inkar dah theihnain in siam ang a, a chungah auditorium te, tin, shopping mall tha tak te a awm ang a. Vaibelchhe za atang vaibelchhe zanga inkar chuan a tih theih mai ang a, chu chu Central ah te harsa lutuk lovin a tih theih mai ang tih rinna ka nei ve a. Chuvang chuan, a tha ang a,’ tih kha kan sawi a. ‘A neitu kha tu chiah nge maw ni le’, kan Chief Minister zahawm tak khan a ti a. Pu Khama, kan thenawmpa khu an dawr ber chu a ni a, a ta a ni ang a,’ ka ti a. ‘Chuti chu min lo sawipui ta che a,’ ti a. Tichuan, phone-in ka zu bia a, chutatanga hei hi kal a ni a, a hmaa an lo tum chu thudang ni se la. Chu chu ka inrawlh ve dan chu a ni mai a. Thenkhatin lo ngaihthiam loh emaw opposition ni sia sorkar nena lo tih chu an ti maithei a. Mahse, ram tana thil tha tur nia ka hriat ve flat avangin phai lam atanga an rawn lei mai ai chuan kan ram sorkar emaw, mimal emaw, Mizopa in emaw lei se thain ka hria a. Chu chu ka rilrua ka lo put ve dan a ni a.

Tin, pakhat lehah chuan kan Chief Minister zahawm tak hnenah pawh ka sawi a, ‘kan DC office pawh hi kei, tunhma atanga ka lo dream dan chuan court rual hian lai hniam vek ila, tichuan, a hnuaiah basement kan siam ang a, car parking kan siam ang a, a za tel a dah theih ang a. Chutatanga feet riatah car parking kan siam leh ang a, a chungah feet riat bawkah car parking kan siam leh ang a, chumi chungah chuan DC Office nalh tak kan sa ang a. Heng te hi ngaihtuahnaah nei ula ka va duh em,’ ka ti hial a ni. Amaherawhchu, INTACH ho hian an phal lo deuh niawm tak a ni a. Mahse, kan rama thil tha tur kan siamna kawngah hian thil hlui chu kan hnualsuat tur a ni hauh lo va, keima mimal ngaihndan chuan khingte khi car parking, motor zahnih, zathum, zali,

zanga awm theihin siam baw k ila, a piaha kan siam baw k chuan helaia kan problem zawng zawng hi a solve vekin ka ring a. Chuvangin, khangte pawh kha ka'n rawn a. An rilruah a awm chiah em tih erawh chu ka hre lova. Khitilai cinema hall hlui lei kha a tha hrim hrimin ka hria a, kan sorkar leh hun kan nghah dawn chuan kum thum a la ni si a, kum thumah chuan nuai sangkhat leh zanga ai chuan a tlem dawn lo hrim hrim si a.

Chuvangin, tuna sorkar hian a theih phawt chuan ti mai se tih kha keima rilrua, party lampang pawh ka rawn chuang lo, keima rilrua thil tha tih i ning suh ang u tih ang deuh khan thil tha a nih phawt chuan khalaiia kan tanruah kha a tha alawm ka ti a. Hei hi, enge ni, part ka lo la ve mai a ni e. Ka lawm e.

SPEAKER : Awle, ding leh vei intawhna hun a ni a, a lawmawm e. Tunah chuan zawhna 57-naah kan kal leh ang a, a neitu Pu Lalruatkima zawt turin i sawm ang.

Pu LALRUATKIMA : Pu Speaker, ka lawm e. Member pahnihte zawhna a ni a, zawhna inluhthelh hret a awm pawhin min lo hrethiam dawn nia, a inkhaikhawm avangin. Home Department changtu Minister zahzawm tak chhan atan –

- a) Zokhawthiang daia HPCD ten MLA te leh Police an lambunna a Police te kha ex-gratia, compassionate ground, etc. an pe tawh em?
- b) Pek an nih tawh chuan Ex-gratia etc hi engzat theuh nge pek an nih a, compassionate ground in tuten nge hamthatna dawng?
- c) Police duty a kal hel ho lo do let tute kha lawmman pek an ni em? Pek an nih chuan eng lawmman nge pek an nih a, engtikah nge pek an nih?
- d) 28/3/2015 a Zokhawthiang daia MLA te lambunna a Police pathum nunna chante sorkarin zangnadawmna a pe em? tih kha ka'n zawt a ni e.

*Speech not corrected.

SPEAKER : Aw le, a neitu Home Minister zahawm tak chhang turin i sawm ang.

Pu R. LALZIRLIANA, MINISTER : Pu Speaker, MLA zahawm tak Pu Ruatkima leh Dr. K. Beichhua zawhna chhanna chu-

- a) Zokhawthiang daia HPCD ten MLA leh Police an lambunna a Police nunna chan chhungte hnenah Ex-gratia pek turin approval sorkarin a pe tawh a.
compassionate ground in mi pahnih chhungte hna pek tawh an ni a, pakhat erawhchu pek a la ni rih lo.
- b) Police thi pathum te hnenah zangnadawmna ₹ 10 lakh theuh pek tura approved tawh a ni a, chungte chu :
 1. S.I Zoramthara Khawhling, AZL DEF
 2. D/G-III C. Lalchuaailova, AZL DEF
 3. C/573 Hmangaihawia, 1st Bn.MAP

Appointment pek tawh te chu:-

1. K. Lalhmangaihtluanga b/o Late S.I (UB) Zoramthara Khawlhiring chu H/C (Opr.) hna MPRO ah pek a ni.
 2. Denghliri w/o Late D/G-III C. Lalchuilova chu IV-Grade hna Serchhip DEF ah pek a ni (Appointment orders thil tel a ni).
 3. C/673 Hmangaihawia (L), 1st Bn.MAP chungte hnenah compassionate appointment hi pek a la ni lo.
- c) Police duty a kal hel ho lo do let tute hnenah lawmman pek an la ni lo.
- d) 28/3/2015 a Zokhawthiang dai a MLA te lambunna a Police pathum nunna chante hnenah sorkarin zangnadawmna ₹ 10 lakh theuh pe tura approve tawh a ni a vide No.D.32011/1/99-HMP dt. 2.9.2015 (copy enclosed). Amaherawhchu, heng zangnadawmna pe tur hian Director, Disaster Management & Rehabilitation-in sanction order a buaipui mek a ni.

SPEAKER : A neitu Pu Ruatkima zawhbelhna .

Pu LALRUATKIMA : Pu Speaker, kha ₹ 10 lakhs mi pathum hnenah pek turin approve tawh a ni a ti a. Hemi Office Memorandum 27.10.2010 Finance Department tihchhuahah hian Action Against Militants, Terrorist and Extremist etc te ex- gratia lumpsum compensation atan ₹ 15 lakhs tiin OM chhuah a ni a. Engvangin nge ₹ 10 lakhs chauh pek an nih ? Engvangin nge ₹ 15 lakhs OM chhuak ang hian pek an nih loh tih kha ka'n zawt tel ni sela.

Tin, zawhna dang lehah chuan, Hmangaihawia, Dinthar ami chhungte hnenah khan compassionate appointment pek a la nih loh chhan kha ka'n zawh belh baw k a. Tin, chumi bakah chuan, a hliamte kha award emaw reward emaw kan tih ang chi lawmman hrim hrim kha pek tur ni awm tak kha a ni a, an duty-na a hliam tuarte kha, chu chu engatinge tun thlenga pek a la nih loh tih kha ka'n zawhbelh leh baw k a ni e.

*Speech not corrected.

SPEAKER : Zawhbelhna Pu K. Beichhua

Dr. K. BEICHHUA : Pu Speaker ka lawm e, ka zawhbelhna chu khang inlambunna han tawkte kha hmunralti a kal tur an ni tih Aizawl atangin kan hre theuh a. Deputy Chief Whip meuh leh MLA pahnih kal tur kha Aizawl atanga security pek loh an nihna chhan enge ni tih point khatna a ni a.

Pahnihnaah chuan, an kalna hmun tur kha a ralti tih kan hria a, security clear tura hmalakna a awm em tih kha ka zawhna a ni baw k a. Tin, khami inlambunna a hliam tuarte hnenah tanpuina pek a ni em tih kha ka rawn zawt baw k a. Tin, ex-gratia kha kan hriat angin moral obligation, danin a phut kher kher ni lovin, kan member zahawm tak khan nichinah khan a rawn sawi Chiang a, khalai kha kan ngaih pawimawh a tul hlein ka hria a.

Tin, a tawp bera ka sawi duh chu, rorelna sang a member chinte hian dawt hi sawi lo ila tha ka ti. A chhan chu he inlambunna thleng pawh hi a nih na dik takah chuan thu diklo dawn vang a ni. Assurance Committee-in Assurance No. 303 niin ka hria a, tah khan Pu R.L. Pianmawia bial chhunga clinic sub-centre zawng zawng pasarih kha sak zawh tawh a ni tiin an chhang a ni, chuvanga kal an ni a, a pawizia chu kan hre theuh a ni. Chuvangchuan, nimin lama kan Minister zahawm takin a NLUP motor 68 a ni a tih a 65 a ni kan tih, dik taka kan sawi ngawih ngawih pawh a, dawt a sawi mai kha paw ka ti a, vanduaithlak ka ti baw a ni. Ka zawhbelhna chu chungte chu a ni e, Pu Speaker.

Pu H. ZOTHANGLIANA : Pu Speaker, ka zawhbelhna chu MLA te leh Police-te lo lambuntute, helte kha man an ni tawh em? Man an nih chuan engzatnge man ni tawh ? Man kim barh an nih a, dan ang taka hrem an nih theihna turin engangin nge sorkarin hma a lak zui zel tih a ni e.

SPEAKER : A zavaia chhang turin Minister zahawm tak kan sawm ang a, zawhna dang a awm thei tawh lo vang.

Pu R. LALZIRLIANA, MINISTER : Pu Speaker, MLA zahawm tak zawhnate kha Finance Department hian hmanah OM an lo chhuah a, a class deuhin an lo then ni awmin a lang a. Operation nei tura kalchhuakte an thihin ₹ 15 lakhs pek tur a ni a, a hnuai deuh category 2-ah chuan, inkahnaa Police-te an thihin ₹ 10 lakhs pek tur a ni a, ti ang chiin a awm den den a, hliamtuarte pek tur leh khangho kha. Home Department lam chuan kan ngaihdan dik tak chuan tun amite hi hel area a kal an ni a, kan MLA-te hi; chuvangin operation-ah an kal ang a treat turin kan duh a, chutiang tur pawh chuan dilna kan siam a. Amaherawhchu, Finance Department lam atangin hei hi operation nei tura chhuak an ni lova. An kal a, an kalnaah vanduaina an tawk mai a ni, tih ang deuh ngaihdan an neih avangin ₹ 15 lakhs kha kan pe thei lo a ni tih kha ka chhanna a ni a.

Pu LALRUATKIMA : Pu Speaker, khawngaihtakin he lai kan OM hi kan chhiar chhuak lawk anga, kan Minister zahawm tak khan min lo hrethiam sela. A chhan chu OM-ah hian interpretation hi a dang a dang thei a -

- a) Death occurring due to accident in the cause of performance of duties- ₹ 10 lakhs.
- b) Death occurring in the cause of performance of duties attributable to acts of violence by terrorists, anti-social elements, etc- ₹ 10 lakhs.
- c) Death occurring due to :-
 - a) Enemy action in international war or border skirmish and
 - b) Action against militants, terrorists, extremists, etc - ₹ 15 lakhs.

Khami tanchhan khan pek theih a ni dawn lawmni kan tih chhan a ni a.

- d) Death occurring while on duty in the specific high altitude (SPEAKER : A chhang mek alawm, tunah khan a chhang tawh alawm).

Kha lai kha hriatfiah tawk lohte awmthei anih avangin. ₹ 15 lakhs pek theihna dan kha a awm tlat a.

*Speech not corrected.

Pu R. LALZIRLIANA, MINISTER : Kha kha, Pu Speaker, ka sawi kha a ni a. Interpretation a dan a dang thei a. Sum ui vang emaw, lehlamah Finance department chuan khati zawng khan ngaihndan an nei thei a. Home department chuan nuai ₹15 lakhs pek tura tih kan ngaihndan a ni tih kha, chu chu kan sawi nawn a ni. Tin, hliam tuarte kha pek loh an la ni em? ka hre lova, hei hi. Hliam tuar kha (interruption). Heng hi chu kan lo ennawm ang a, pek tur chi an ni em tih te kha.

Tin, security lo clear turin kal an awm em tih te kha. A hmasaah khanin an hmaah SI 1 leh Constable 1 an kal a, silai pawh an ak ve ve a, tichuan bike-in an kal a ni. Chungte chu lo clear tura ngaih an ni. Amaherawhchu, heng helho hian anni 2 mai kha chu lo kap duh lovin, an kal pel a. An kalpelhna atanga meter 300 vel chauhah khan khua kha a awm a, tah chuan an lo va awm a. Silai an kah ri te pawh an hre vek a. Khamite khan thiante pui lovin an lo awm a, kan dem khawp a. Hengte hi DE draw ani a, engtingge kan hrem dawn, kan hotuten DG hovin an ban dawn nge, engtingge an tih dawn chu ka hre lova. Chutiang chuanin an chungah hian eng action emaw chu lak ani ngei dawn tih kha ka han sawi duh a.

Tin, security Aizawl atanga pek loh chhan kha, khilailah khatiang ang kha awm turah kan ngai lova. A bialtu MLA pawhin, “Kan han kal hi chuan zah an ngai a, an lo kal sawn ve mai thin a ni,” tih te pawh a sawi a. Chuvangin, security kha helai atangin kan pe lova, pek tur a ni a, engemaw intawn sual vangte pawh, ngaihndan hran deuhte pawh awm avang a ni maithei e.

Tichuan, MLA lambun tute kha engzat nge man an nih tawh tih kha, 1 kahhlum a ni a, 1 hmanni khan, khami zinga tel kha, man leh tawh a ni a. A bak chu man an la awm lo a ni. Chu chu ka chhanna a ni e.

Tin, Pu Speaker, keimahni fimkhur lohna hi mahni pawh in mualpho zel tha in ka hria a. Hmangaih mawia hi helailah hian C/573 pakhatat hian a ti a, a hnuaiah hian C/673 Hmangaih mawia a rawn ti leh a. Hengte pawh hi kan MLA-te hian lo hmu ve selang chuan, in fimkhur lo mang e, anmahni hian han ti zawk se la ka duh viau a. Hetiang ang hi awm leh tawh lo se la ka duh ngawt mai.

Pu LALRUATKIMA : Compassionate pek anih lohna chhan kha ka zawt tel a, min la chhang ve lova. Midang 2 te chauh kha kan Minister zahawm tak

SPEAKER : Kha kha ngaihndan a inang lo...

Pu R. LALZIRLIANA, MINISTER : Pu Speaker, kan lo chhang leh lawk ang e, khawngaihni. Hmangaihnia chhunge hi kan la pek loh chhan chu, anmahni khan tunge ni pek tur tih kha an rawn sawi thei rih lova. An chhunkua, a nupuite leh a unauite ngaihdan a la inmil lova. Police lam hotute pawhin ti sawk sawk rawh u an ti a, hmanni lawk thleng khan decision an la siam theih loh avangin kan pe lo mai a ni e.

Dr. K. BEICHHUA : Pu Speaker, hliamtuarte ka zawh chungchang kha, khatianga na taka hliam tuar meuh kan Home Minister-ina a hriat loh kha, a va mak ve, pek leh pek loh, an la pe lo a ni lo maw, an ngaihthah vang a ni lo maw.

SPEAKER : Ka hre rih lo a tih kha.

Pu R. LALZIRLIANA, MINISTER : Kha kha chu nichinah khan kan chhang vek tawh a. Hliam tuar 1 hi Pu R.L Pianmawia driver kha helaiah SAD lam atangin, hetiang ang hian hliam an tuar a, keimahni avangin, tiin MLA zahawm tak, khilai bialtu khanin, ngenna a rawn siam a. Chuvangin IV grade appointment tur a tih mek a ni.

SPEAKER : Zawhna 68-na kan kal thei tawh em? Pu K. Sangthuama zawt turin i sawm ang.

Pu K. SANGTHUAMA : Pu Speaker, ka lawm e. Ka Starred Question 58-na, kan Home Minister zahawm tak chhan atan—
Mamit District-a Indo-Bangladesh Border Fencing Social Infrastructure khaw 4 (four) chhengkaw (family) 1447 tan a ₹ 14,29,94,000/- sanctioned tawh hi wawin thleng a la pek loh hi eng nge a chhan tih ka zawt e.

SPEAKER : Home Minister zahawm tak chhang turin i sawm ang.

Pu R. LALZIRLIANA, MINISTER : Pu Speaker, MLA zahawm tak Pu K. Sangthuama zawhna chhanna chu—
He pawisa hi mimal family tana pek tur a ni lova, Social Infrastructure Community Hall, Health Sub-Centres, Schools, Market Sheds, Playgrounds, Approach Roads, Masonry Steps, Irrigation leh Water Supply siamna tur a tih ni a.

Wawin thlenga sum pekchhuah a la theih loh chhan chu Financial Sanction D.C Mamit hnena pek tawh chu Financial Year tawp dawn 27th March, 2015 ah a ni a, hun a liam hman tak avangin finance concurrence hi waw 3 lai dil that leh a ni a, nimahsela an duhdan ang a la nih loh avangin an la pawm thei lova. An thurawn angin Estimate thar nen Finance department-ah concurrence dil that leh tum mek a ni.

SPEAKER : Zawhbelhna neituin a zawt ang a, chu lo midang 2 in an neih belh theih ang.

Pu K. SANGTHUAMA : Pu Speaker, hei administrative approval expenditure sanction on permission for withdrawal in AC bill pawh hi a rei tawh viau a. Heta an sanction pawh hi ni 19.12. 2014 a ni tawh a, chu chu Mamit DC hnenah hian pek thlap a ni a. Chuvangin, vawiin thlenga hei hi sanction tawh si, draw theih loh si, vawiin thlenga an tuar hi an lung a awi lo khawp mai a. Chuvangin, ka zawh tumna pawh tuna mi kha a rawn ti fiah leh ang lawi a. A chhan chu, engvanga pawisa hi la draw lo nge, AC bill a draw vek tura tih an draw theih lohna chhan chu tunah khan a rawn sawi a, a Chiang mai turah ngai ta ila. Engpawh nise, zawhna hranpa chu a ngai ta chiah lova. Tin, hei engpawh nisela, a hma thei ang berin lo buaipui ta ula a that a rinawm a, chuvangin hetiang a objection Finance lamin an rawn siam hi erawh chu ka'n zawt talh teh ang. Engvanga an tihdan hi a fello nge? AC bill-a draw vek tura tih tawh si hi Finance-ho hian objection an rawn siam lehna chhan hi ? tih ka zawt a ni e.

Er. LALRINAWMA : Pu Speaker, zawhbelhna. Indo Bangladesh border fencing chungchangah hian Mizoram khaw engzatnge hung hnan a nih? Mizoram pawn lamah an hung hnante chu engtia zau nge tih ka zawhbelhna a ni e.

SPEAKER : A dang a awm loh chuan Minister zahawm tak chhang turin sawm ila.

Pu R.LALZIRLIANA, MINISTER : Pu Speaker, nichina kan chhan tak ang khan question neitu Pu K.Sangthuama, MLA zahawm takin a han zawh lehna kha Finance department duh dan kan la fulfill chiah loh avangin tum thum lai an han kir leh tawh a ni tih kha a ni mai a. Chuvangin lo bawhzui chakte pawh kan lo tum ang e.

Tin, Border fencing Er.Lalrinawma zawhna kha chu tunah hian ka chhang thei mai lo a ni.

SPEAKER : Zawhna 59-na kan kal thei ang a, a neitu Er.Lalrinawma zawt turin ilo sawm ang.

Er. LALRINAWMA: Pu Speaker, ka lawm e. Tourism department changtu Minister zahawm tak hnena ka zawhna Starred Question No.59-na chu-

- (a) Tun dinhmunah Mizoram hmun engzatah nge trekking route siam tura hma lak a nih?
- (b) Estimate engzat te nge an nih tih a ni e.

SPEAKER : Minister zahawm tak chhang turin ilo sawm ang.

Pu JOHN ROTLUANGLIANA, MINISTER : Pu Speaker, member zahawm tak Er.Lalrinawma Starred Question No.59-na chhanna chu –

(a) Tun dinhmunah Mizoram hmun 3-ah trekking route siam mek a ni.

(b) Name of Project Estimate (₹ in lakh)

(1) Trekking Route Aizawl ₹ 400.00

Reiek – Ailawng

(2) Trekking Route Chalfilh ₹ 800.00

(3) Trekking Route Blue ₹ 495.07

Mountain –Sangau

Ka lawm e.

*Speech not corrected.

SPEAKER : Zawhna hun a zo dawn a, i zo lawk ang u hming, a tha em? Han zawt rawh pakhat chu - zawhbelhna.

Er. LALRINAWMA : Pu Speaker, ka lawm e. Sum engzatnge sanction a nih tawh a, engzatnge release a nih tawh tih kha pakhatna ah nita sela. Pahnihna ah chuan tun dinhmunah heng hna te hi tan a ni tawh em? Physical achievement leh Financial achievement engzatnge tih ka zawt e.

SPEAKER : Minister zahawm takin chhang se.

Pu JOHN ROTLUANGLIANA, MINISTER : Pu Speaker, a hmasa ber ami Trekking Route Aizawl, Reiek – Ailawng kha a hna hi 40% zawh tawh a ni a, sum hi ₹ 80,16,000/- released tawh a ni a.

Tin, trekking route Chalfilh atan hian a project hi 45% zawh tawh a ni a. Pawisa hi ₹ 160.00 lakhs released tawh a ni a. Trekking Route Blue Mountain –Sangau hi a project works hi 50% zawh a ni tawh a, pawisa ₹ 99,10,000/- released a ni tawh a.

Tin, Pu Speaker, member zahawm takte lo hriat atan hemi project bik hi tunah hian a tawp rih a; Chuvang chuan 2nd Installment a lo kal thei lova, hna zawng zawng pawh hi chawlhlan a ni a. Delhi lamah te pawh kan ngaihven a, amaherawhchu, tun sorkar khuan a la rawn tihnun leh loh avangin pawisa a awm lova, kan tawp rih a ni e. Ka lawm e.

*Speech not corrected.

SPEAKER : Zawhna hun chu a ral ta a. Business dangah kan kal ang a, kan kal hmain kan member zahawm takte pahnih Pu S.Laldinglana leh Pu Hmingdailova Khiangte-te hian House-a

awm loh phalna an dil a, kan phalsak a ni tih kha he House-a member zahawm takte hian hria ila a tha ang e.

Tunah chuan Laying of papers-ah kan kal ang a. Pu Lalrinmawia Ralte, Minister zahawm takin paper 4 he House-ah hian lay tur a nei a, lay turin i sawm ang.

Pu LALRINMAWIA RALTE, MINISTER : Pu Speaker, i phalna leh he House zahawm tak remtihain heng papers –

- i) The Payment of Gratuity (Mizoram) Rules, 2015.
 - ii) The Mizoram Building and Other Construction Workers (Regulation of Employment and Conditions of Services) Rules, 2015.
 - iii) The Mizoram Maternity Benefit Rules, 2014.
 - iv) The Mizoram Industrial Disputes Rules, 2015
- te hi he House zahawm takah hian ka rawn lay e.

SPEAKER : A copy sem ni se. Copy sem chhungin kan inthlak lawk ang e.

DEPUTY SPEAKER : A copy kan changkim tawh maw. Tunah chuan Financial Business-ah kan kal ang a. 9.10.2015 (Friday) a Finance Minister-in Budget a pharh tak kha General Discussion kan tan tawh ang a. General Discussion atan hianin 2 (ni hnih) hun kan nei a. Member-ten 10 minutes theuh hun hmang ila a tawh kan ti mai em?

Er. LALRINAWMA : Pu Deputy Speaker, sawi leh sawihnu bawh kan thianten document hmuh sa tam tak an nei tawhin ka ring a, a hma te pawhin an hmu lo ve mai thei bawh a. Amaherawhchu, 10 minutes kha chu a reilo deuh lo maw? Ni 2 lai kan nei a. Tin, kan sawi kim vek ang nge kim vek lo ang tih pawh a hriat theih chuang lova. Opposition lam chuan an sawi deuh tlangpui a, Ruling lampangte an inthlahrung deuh nge ni. Engemaw, first timer chu an inthlahrung deuh hlek thin a, amaherawhchu ni hnih lai hun pek a nih avangin minute 15 tal hun pek kha a tha lawm ni tih kha Pu Deputy Speaker ka'n rawt a ni e.

DEPUTY SPEAKER : Minute 15 rawtna a awm a, minute 10 nge kan tih ang minute 15 enge kan ngaihnan le? Minute 10 ti ila, a tui deuh kha chu strict lutuk lo deuh ila. Minute 10 a zo thei kha an tam dawn a nia. Chuvangin tlema a han tui fal deuh kha chu ngaihnathiamna te pawh nei ta zawk mai ila, tichuan ti ang aw. Le tunge han sawi hmasa ang le, sawi duh kan awm lo em ni? A tir lam hian kan inkian a, a tawp lamah hian bell hmeh hnuah pawh hian kan la thu hlei thei leh si lova, sawi duh kan awm loh chuan kan sawihona kha kan duh tawh mai dawn em ni ang, Aw, Pu P.C. Zoram Sangliana.

Pu P.C. ZORAM SANGLIANA : Pu Deputy Speaker, i vei lama miten an tan kan beisei deuh hlek a, mahse kan tan teh ang. General discussion a nihna ang ngei a han hman

pawh ka duh viau naa, mahse, tulna bik deuhah chuan tlema han chen deuh pawh a ngai mai thei a.

Hei kan Finance Minister zahawm takina nidang ang lo tak nge ka lo bihchian loh vang zawk ka ti deuh a. Keini ang tan pawha fiah deuha Budget Speech a rawn nei leh a, a bu mawi taka min han pe hi chu. Keini ang, a bu te keu neuh neuh peih lo, keu pawh a hre thiam chuang vak lo tan pheih chuan min chhawk zangkhai em em a. Kan vei zawngte general discussion bikah pawh hian han sawi hi a remin ka hria.

Hei kan ram kan hnam hi uluk taka ngaihtuah chuan Pathianin min din dan te, min dah bik dan te thleng hian kan House Leader hnen atang te pawhin kan ngaithla thin a, a bika enkawl tih hi, mihlim kan ni emaw, mihlim kan ni lo emaw kan pawm tlan vek niin ka hria a. Chuvang chuan vawiinah pawh hian he general discussion hi a pawimawh em emin ka hria a, chuvangin han tantu nih pahin ka'n sawi duh a.

Hei, hmun dang atangin hnam dangten kan ram hna lian tak tak te min rawn thawh sak rual hian ka hriatna hi a soal loh chuan Pu Dy. Speaker, Tender an rawn chhanna a ni emaw, supply an dawn ang hian an bungraw neih hi an tarlang tel vek a, chung an bungraw neihte nen chuan heng hna kan rama an rawn thawh hian an rawn keng kim em? tih hi enzui ngai leh ven ngun ngai niin ka hria a. Hemi ka'n sawina chhan chu, tun hnai lawkah tun atanga kar hnih pawh tling loah hian Bairabi-ah Mizo thalaite huap YMA khawmpui a awm dawn a, chutah chuan tihtakzet maia kan Engineer ten, Engineer-in-Chief atanga E.E., J.E., SA ten an vilnaah, kan House Leader, kan hotupa hovin ruahpui vanawn malsawmna ruah kan dang thei lo chung pawhin, (LMV) motor te nen lama kal theih tura, ruah te a sur lo a nih pheih chuan Mizoram kawng dungah hian kawng tha ber kan nei dawn niin ka hria a. Inrinni te pawh khan ka zuk kal a, Vil ngun tak tak hi chuan, kan ramah hian kan Officer te hian, kan thawktute hian an hna hi an thawk (thupekna a awm avangte pawh a ni thei a) kan hotupain Office atanga nasa taka min vil sak avang pawh niin kan hria. Kan Chief Engineer ngat pheih chuan he thla hnih lek chung pawh hian vawi li lai a tlawhin a han vil hi ropui ka ti.

Chutiang chuan hei, a bik takin hnam dang kan rama kan hmasawmna tur rawn thawk thin hote hi an bungrua hei hi kan nei, an tih te nen hian an rawn thawk takzet em tih te hi kan bihchian, kan en zelna atan hmasawmna beisei Mizo mipuite tan hian a tulin ka hria.

Kolasib khawpuiah khuan Kolasib tlangval ngeiin khawpui a black top hna thawk a awm a. Hnam dang thawh ni lo, Mizo tlangval, a khaw tlangval ngei, hetiang thawk ve theiin a thawh khu, Mizo tlangval mi thiam Engineer-in an han vil bawh chuan vawiinah hian District khawpui kawng tha ber kan ni ang tih ka ring a ni. Veng kilkhawr tak tak thlengin, mahse, mipuite leh bialtu te ngei pawhin kan la hmabak ve, kan tihtura ka ngaih, a kawng bal tihfai te, mahni kawt kawnga side drain lo hai fai ve deuh te hi chu kan tih ve awm tak a ni.

Mizo hnam hi Pu Deputy Speaker, ka hriat ve dan chuan hnatlang thin, lawm tha sut thin, khaichhuah ngai te pawh khai chhuak thin hnam kan ni a. Vawiinah hian khaw tam tak mai, kawng avang te, mirethei chhanchhuah ngai, tanpui ngai avang tea hnatlang a han awm te hi mi tam tak chuan sorkar department demna zawng a sawi peih an han awm tlat thin te hi a Mizo lo em em hian ka thuthmun atangte hian ka lo ti ve thin a. Mizo hnam, hnatlang thin, midangte pawh khai chhuak thin, chutiang chuan sorkar-ina kawng a pek te, siam te, chung a lo chhiat nikhua a mahni kawtkai leh a vel te sam fai nachang leh a khuar lo hnawh nachang hria te. A bik takin hei Durtlang khua leh khaw thenkhat te, an kawngpui vanga khawnawta an han hnathlang te hi Chanchinbu leh news a lo hmuh te hian Mizo hnam nun mawi, Pipute atanga kan chhawm kha, kawng sat thin, sam fai thin, zia kha an va lantir niin ka hria a.

Heng angte hi kan inzirtir ngun leh a ngaiin ka hria. Ka bial ngeiah pawh a khaw tlangval kawng siam ngei pawh chu, hmun thenkhatah pheii chuan black top la tha em em si, han tlan paha kawng ba-ina min la hawl thuk thukna hi a la awm a, chung sam fai chu kan tih ve tur niin ka hria. Mizopain feh kawng a sat ang khan, kan kalkawngte pawh hi sat thar leh turin puan ven kan sawi chhing dawn lawm ni?

Tunhnai lawkah nimin Sunday-ah mai khan Pu Deputy Speaker, kan Home Minister leh a thawhpui Officer leh Police Department-te hnathawh thalo lang hi SMS-ah ka hmu a. October ni 3 tlai a, hmeichhe naupang kum 7 mi lek hnamdang lehngalin a ruk kha, ram pawn Silchar khua atanga km 60 vel a hlaah, Mizoram Police (an kut phuar sak loh ten) an han chhanchhuak hi a ropui ka ti a ni. Kan Home Minister leh a department te hi lawmpuina he House kaltlang hian pek hi an phuin ka hria. Chuvang chuan, kalna hria, police te an hmanna tur dik taka hmanna chang hria sorkar-ah hian naupang leh hmeichhia, State pawn ami daih Sunday ni a chhanchhuah a han ni hi lawmawm ka ti takmeuh a. Chuvang chuan Pu Deputy Speaker, kan ram tawng tawngpui hmangin kan Home Minister leh a thawhpuite hi 'Jindabad' ka pe a ni!! Chumai a ni lo, House Leader, thlamuang tak leh zalen taka an duh ang thala che thei a mitmei ven ngai lo, leader kaihhraina fuh vang a ni a. Chuvangin leader pawh hi 'long live' ka pe bawka ni. He hlawhtlinna avang hian, Pathian hnenah lawmthu ka sawi. Kan hun kal tawhte han thlir let ila, kan hun tawng ava danglam ta em! A bul ber chu Pu Deputy Speaker, ka hmuh ve dan chuan police, kan ram leh hnam tana inpe, an nunna hlantute hi an kut phuar anih loh avangin chhanchhuah ngai te chhanchhuaha an awm hi lawmawm ka ti a ni.

Sorkar kaltaah leh tunhnai lawkah pawh kan Chief Minsiter zahawm tak in a thusawinaah 'District Hospital te thihna tlaka siam' tih laia hi a thu hian, kei a bik takin ka bial ang pawhin min telh a, District Capital kan nihna ang pawhin kan District Hospital chungchangte pawh hi han tarlan ka'n duh a. Vawiinah kan District Hospital khu, hun rei tawh tak atanga kan lo neih enkawl ngun pawh ngai tak, enkawl na atan pawh a sum leh pai senso kal buatsaih reng a ni a. Chutiang anih lai chuan project kan siam tur leh kan tih tur kan tih mek angah te hian ngaihtuahna fel tak a productivity a awm dawn em? kan chhawr tangkai dawn em?

Mamawh angin a man hu tawh Project Building sak tawh te hi kan hmang dawn em? hmang turin mihring kan in ready em? tih te ngaihtuah a ngai.

District Hospital chungchang sawi pah a tarlan ka duh chu :- Kolasib Town chhunga Thingdawl-ah khuan Higher & Technical Department kaltlangin 1230 lakh a ruahmannaah, 800 lakh sengin building lian pui pui mai pali, 2014-ah khan sak zawh a ni a, Administrative Block te, Electrical Trade Building Block, Automobile Trade Building Block leh Multipurpose-cum-Library te sak zawh tawh an ni, September thla 2014 khan.

Vawiinah a nih tur anga a function loh chhan chu, mihring an awm loh vang a nih ka ring. Tuna a enkawltu, a Building satu PWD hna engnge kan tih chuan? (leilawn pawh, electric ban pawh, a nut phelh, hralh thinte zingah hian) a bo ve mai ang tih te pawh a hlauhawm a, ven kha an hna a ni. Chu chu hna chuang a ni. Heng te hi engtin nge kan hman tangkai ang? Polytechnic-ah te hian engtikahnge naupang kan luhtir dawn? engtingge kan hman tangkai dawn? Chutih laiin a bul lawkah Nursing College sak a ni a, chutah pawh chuan, an sen zah chu ka sawi lo mai ang e. Chung an sak te pawh chu vawiinah hian a lawmawm em em mai a. Main Building atan te, Girls Hostel atan te 2013 leh 2014 a zawh Building lian tak pahnih a awm a.

Pu Deputy Speaker, Health Department-in a bik a kan District Hospital chei that ngai tak te, Kolasib Town a (bial mipuite chu ka rawn hauh lo). Amaherawhchu, kan District Hospital tan Project lian, kan mamawh District Hospital atan Central-ah siam ta ila, chutih chhung atan heng Polytechnic Building pali lai ven ringawt, engatan mah hman loh, Nursing Administrative Block leh, Main Building te, Hostel ang te pawh, ka'n thlir ve mai mai dan chuan, Kolasib District Hospital khu kan lo sawn lailawk thei mai awm mang e aw, a leng thei mai angem aw? ka ti a. Ka sawina chhan chu, Hospital tha District-in kan mamawh rual khan Pu Deputy Speaker, heng ang, hman nghal maina tur pawh awm lo hi i chhunzawm lo ang u. Kan Finance Minister zahawm tak Budget Speech-ah pawh hmun kilkhawr tak takah building lian sakna tur a lang tlatin ka hria. Sa zo ta ila, luah tur an awm angem? tih ngaihtuah a ngai a ni. Chuvang chuan, Pu Deputy Speaker, sawi loh theih loh niin ka hre tlat a.

Pakhat ka han sawi leh duh chu, kan ram hi, kan Sorkar flagship programme atangin kan tih uar deuh chu, tlang ram loneih ban turin hma kan la a. Chutih rual chuan ka bial Kolasib District-ah khuan hma lak that em em mai an nei a. Chumiah chuan, July 21 ah khan, kan Agriculture Minister zahawm tak tawiam khan Kolasib District, WRC Farmers Meet-ah ka zu tel ve a. Chutah chuan resolution, farmers kalkhawm 700 chuang leilet nei thah, chhungkaw 700 chuang in resolution Point 7 lai mai passed a ni a.

I remtihain Pu Speaker, chumi resolution 5-na leh 7-naah pheih chuan ti hian an ziak a. "Buh tharchhuahte herna tur (Processing Mill) mimal emaw, Society emaw din tura hmalak ni se. Mills bunna hmunah emaw, a remchan dan angin buh hi lei leh hralh a nih theih nan Sorkarin

ruahmanna fel tak siam se. Kolasib district chhunga buh tharte hi District chhunga buh herna (Processing mill) ah chauh hralh tura hmalak ni se”. Vawiina kan leilet neitute hian an leileta tharchhuah 70% hi hnam dangin an chang a, 30% an chang ve hram a. Chumi 70% nen lam chuan keimahni Kolasib district ah te a herna khawl awm ta se la. Chutih rual chuan Supply Department-in Burma ram atangte a lei a inhuam ang khan, Kolasib district leh kan farmers tena an leilet atanga an tharchhuah hi lei dan tur te hi kan ngaihtuah a hun tawh hlein ka hria.

Resolution Point 7-na hi a ropui lehzuol a, “Sorkarin buh chinna tura WRC-I leh II a siam te hi buh chinnan a hmanglo an awm chuan, tanpuina awm thei ang ang pek chungchangah hrek ni bawh rawh se” tih a ni. Leilet neitu 700 rual resolution, kan Agriculture Minister zahawm tak ka tawiawm tum a an passed a ni.

Pu Deputy Speaker, chutiang chu anih avangin, kan chezia/hawiher pawh hi thlak a hun khawpin ka hria. Buh tharchhuah tam kan duh chuan, kan leilettute lo ah awm rawh u tih ringawt a ni lo. An buh thar kha hlawk tura tih a ngai a ni. Chutiang chuan heng subject bikah te hian han chen ka duh a.

Tin, Education-ah hian pakhat chiah sawi leh ka duh a. Kan rama kan harsatna chu, mahse Education Minister zahawm takin MLA zawng zawngte nen, a phurrit kan phurhpui hlauh mai a, a fing a. Vawiina ngaihtuahna ka neih chu, kan rama institution, zirna lo din tan tirh atanga han thlir let in, Kohhranten an enkawl hi a hlawhtling a, Sorkar enkawl school a zirtirtute hian an tu leh fate hi an thawhna ngei ngei school a luh tir ai chuan Mission/Kohran school ah emaw private school ah luhtir an duh ta zawk.

Vawiina posting & transfer chungchanga kan harsatnaah te hian, ka ngaihtuah chu, Primary Section atang hian tan ta ila, Pu Deputy Speaker, Mission hnenah emaw, private la theitute hnenah emaw pe ta ila, a thuneihna, an enkawl na a kha kohhran emaw private emaw khan chang ta sela, a thawk mekte an thawh hun chung, an pension thleng sorkar in tum ila. Chutiang a nih na na na chuan a tha ang tih ka han ring a, mawl mang takin.

Sawitur tamtak karah 10 minutes aia tam daih hun min pek avangin ka lawm a, Pu Deputy Speaker. General discussion hi general deuha sawi tum laiin khangah khan a chen loh thei loh a. A dang pawh sawitur tamtak awm mahsela, heng bikah hian ka'n sawi duh a. Hetiang zawng hian, plan siam leh dawn ah emaw department tinte hian project central atanga haichhuah an tum dawn pawhin, kan ram tan hian kan thatpui angem? ti ila, ti hlawhtling ta ila, engtinng e kan hman ang, a tangkai dawn em tih ngaihtuahna nen hian kan mithiamte pawh hian hma la se a lawmawm hle ang tih hi thahnem ngai takin ka han sawi a ni e. Ka lawm e.

DEPUTY. SPEAKER : Tunge han sawi ve leh ang le? Kan duhtawh deuh a mi? Pu K. Sangthuama.

Pu K. SANGTHUAMA : Pu Dy. Speaker, tawite han sawi ve ka duh a. Hei, kan budget hi sawitur tam tak chu a awm ang a, mahse, a nazawng chu kan sawi seng lo ang a.

Hei, han en hian kumina tax, Excise ah 35.68 leh VAT ah 1.5 hmuh beisei a ni a. Hei hi kumin a pawisa kan hmuhna tur belhchhahna chu a ni deuh mai awm a ni a, 37.16 hi. Hei bakah hian enge ni, rawn ziah a awm chuang lova. Hei hi kumina kan hmuh belh tur, keimahni tax atang leh excise atang tein a ni mai awmin a lang a. Kan budget hi a tight thin a, a ruahmantu tan pawh siam thiam a har viau in ka ring a. Chutih rualin, Plan fund atanga kan hman tur helaia an ziahchhuah den denah hian, Soil & Water Conservation ah hian 3.61, AH & Vety ah hian 3.47, Integrated Vety ah 3.12, Minor Irrigation-ah 4.9, PWD-ah 39.87, Food, Civil Supplies-ah hian 27.59 crore, a crore zel a nia kan sawi a kha. PHE-ah 14.44, Cooperative-ah 11.34, P&E-ah hian 24.05, PWD-ah hian UD&PA atanga kal turin 114.70 crore leh 57.87, Finance-ah hian 37.1, Parking hmun tur lei nan 10 crore, MLA Fund-ah 20 crore, Central Society-ah hian 40. Avai hian 342.42, hei hi kan Plan Fund zirtawpni-a kan Finance Minister zahawm takin a rawn tihchhuah, Plan Fund a hlawm deuh deuh a kan hmanna tur kha a ni a.

Kan Plan Fund hi a dik a dik chuan a tlem chhe lutuk chuan a lang lo va. Amaherawhchu, hetilaia a tlangpui thu deuh a a lang lian deuh rawn tar chhuahah hian 342.42 (vaibelchhe zathum sawmli pahnih leh point four two) hi a lian deuh hleka a rawn tarlanna a ni a. Hetih kawngah hian kawng hi a pawimawh hle in ka hria a, kawngah hian hei aia chak zawka hma kan lak theihna tur hi a awm in ka hria a (Chair inthlak – Deputy Speaker to Pu John Siamkunga) Hetilai PWD-ah hian hei aia awmze nei zawk deuh hleka dah chu nise, kan kawng that loh dan chu kan hretlang vek a. Helai House-ah te pawh kan sawi tawh a, sawite pawh kan la sawi zel turah ngai ila. Nin lamah la lo ila, thiltha kan duhna kawngah hian House-ah chuan engchin pawh kan inhnial ang, hmalak dan tur opposition in kan sawite pawh ngaih pawimawh ve thin a ni a, a ni zel turah ngai ila.

Chuvangin, kan Plan Fund reng reng a hi a dang hmanna tur kha chu tikhan ka'n chawckchhuak a. Mahse, ka hritlang nen zanhnih khatah chuan ka chawckchhuak vek seng lo va. Chuvangin kan Plan Fund hrim hrim hi vailbelchhe sangthum chuang a ni a. Helaia kan hman tum dan kawngah hian Plan Fund hrim hrim a hi office lamah te hman a ngai a, chutiang chuan hmun dang danga hman a lo ngai a. Helai development fund atan hian a tam tawk lovin ka'n hria a. Kuminah chuan hei kan siam tawh a ni a, nakum lamah chuan hei ai hian ngaihtuahna kan Finance Minister zahawm tak hian hmang se ka duh a.

Tin, Office Expenses kan tih te leh engnge office a hman tur Other Charges kan tih te kha kan en vang vang a, nikum lam ai chuan a tlahniam deuhin ka hria a, a lawmawm viauin ka hria a. Hman sen loh theih mai a ni kan ti a nikum lamah pawh. Khangah khan kuminah hmasawna tlem kan hmu a, a lawmawm khawpin ka hria a, kan Finance Minister hnenah pawh lawmthu ka sawi duh a. Awmze nei deuh hleka khangte kha kan rilruah awm kan tih chuan pawisa

crore 2,3,4,5, crore 10 a alo tlakhniam chuan a lehlamah alo indaih ve theih thin a. Khangah te te khan budget han siamah hian chik taka ngaihtuahna kan Minister ten, Finance lama kan hotuten ngaihtuahna an hman chuan thui takin hma kan sawn theiin ka hria a. Kum lehlam zel thlengte pawhin ngaihtuahna la hmang se a tha in ka ring a.

Tin, kawng chungchangah hian hmannah hetilai Company pengah khuan kan kal a, a buaithlak khawp mai a, Company peng kawng khu kan hotuten ngaihtuahna tih tak tak deuh hlek an hman a thain ka ring a. Kan lifeline tak tak, kan chaw lakna kawng a ni a. Hmanni pawh darkar chanve dawn lai kan tang a. A chhan chu motor a tam si a, haw lam kal lam, thlang lamah za tel, a chhak lamah za tel an awm a. Khatiang khan harsatna nasa tak kan tawk thin a.

Inrinni pawh khan ka zuk kal a, helama min thla mai tur kha temporary in an lo siam a, mahse khu chu thal chhung a ni mai ang a. Khu khu an min thlak leh pheh chuan motor lian hi a kal thei dawnlo hrim hrim, helam in pahnih khat an min thlakna laiah khuan. Tuna temporary a siam mai khu nilovin awmze nei deuh hlekin siam tum ni sela. National Highway a ni a, PWD chan chu a ni chiah lo tih chu kan hre tlang ang a. Amaherawhchu, 54 National Highway kha niin ka hria a, sawmi Tuipang thlengin. Chupawh nise kan sorkarin kan khawlai kawng a ni a, a tha thei ang bera ngaihtuahna an hman a tul a. Khu khu enchiang ngawih ngawih turin kan ngen duh bawk a ni.

Tin, chutih lai chuan a chhakah khuan DM&R in emawni awmze nei vak lovin Inrinni khan tuihawk luankawr tur emawni a chung deuhah an siam leh mai a. Khu chu a hnuaiyah tui a lo kal ang a, nakum June thlaah chuan a phet thla leh ang a, cheng tam tak senna, kan DM&R pawh hian zuk en se ka duh khawp mai. Hmanni khan an SE a lo awm a, CE emaw ni zawk Pu Ruata hi, ka chiang chiah lo va, kan sawi dun a. Engpawhnise, 'helai chhak lama an tih hi i hriatpui em?' ka ti a. 'Hei chu DM&R a ni e,' a ti a. Khungte khu awmze neilo a cheng tam tak senna tur niin ka hria a. Hnuai deuh hlek atangin drain siam se chu thudang a ni a. Chuvangin khu khu awmze nei deuh hlekin kan sorkar hian Central-ah te pawh ngaihtuahna a hman a ngai hle a ni. Khulai khu a chhiat leh chuan harsatna lian tak kan tawk dawn a.

Tin, khumi Ramrikawn atanga PTC a kal thla khu hman deuh khan nuai 70 lai estimate a awm niin an sawi a. Zawhnaah hian ka zawt a, alo la chhuak lo va. Khu pawh khu helama kal theih loh a a kal theih nan cheng tampui pawh a ngaiin ka hre lo. Tlem khuan JCB hmangin han ti thla ila, boulder han phah ila, cheng tampui a ngailo.

Chuvangin, khang nuai 70 te kha awmze nei lovin an hmang zo ta mai mai nge ni, lo enchian nise a that ka ring a. Nuaih 70 te chuan thui tak a ti thei hrim hrim a. Chu chu enchiang turin waviinah hian kan PWD lam hotute, Chief Minister zahawm tak pawh kan ngen duh a. Awmze nei lo va cheng nuai 70 te a ral leh mai mai dawn anih chuan a dahtu te thinlung leh ti tura titute thinlung kha a na thei. Tin, mipui vantlang thinlung pawh a na thei a. Chuvangin helai kawng a chhiat thulh a, khulai PTC a kal thei tura siamna khu sorkarin pawisa ren lo sela a tha in ka hria.

Khu khu chu kan tih makmawh a ni. Chuvangin tun thal chhungah hian awmze nei takin kan sorkar hian, PWD lam hian ngaihtuahna siam sela. Pawisa awm ang ang pawh khulaiah khuan ren lovin hmang mai ila. Mi zawng zawngin kan chhawr, ka zavaia kan chhawr a ni a. Chu chu hriat reng atan a tha in ka'n ring a, ka'n chah duh nghal a.

Tin, pakhat lehah chuan khumi Sihmui atanga Ramrikawn kalna tura hi kan hre theuh ang a, an tawp leh ta a. Fund a head an thlak avang tiin an sawi a, a dik pawh a dik ang. Engpawhnise, head an thlak anih pawhin tuna hnathawh kal meka khu Central-ah zuk bawhzui chak nise. In bawhzui chak phawt chuan khami head an thlakah khan tih tawh loh tur tihna a awm ka ring lo va. Kal chhunzawm zel theih anih ka ring a. Khu khu lai zo hma ta ila chu kan problem khutilaia harsatna tam tak kala hi chu a kiam duak dawn a. Chu chu mutmawh, hnarmawhah kan sorkar hotuten , PWD te leh UD&PA te hian nei se a tha ka ti a.

Hei, tunah kan UD&PA Minister zahawm tak a awmlo a. Ka'n chah duh ngawih ngawih a, amah pawh zuk kal se, zu sawi sela, PWD te pawh kal se la, sawi se la. Khulai sum leh pai an divert-na atang khan helama kal leh turin tih tak tak zuk chhuah se la. Tun thal chhung hian lai zo vek thei ila, thil harsa a niin ka hre lo. Company pahnih khulaiah khuan an dah a. Bulldozer te, JCB te in a tih chuan thui lutuk pawh a ni lo. Tunah pawh khan ka zawt a, alo la chhuak lo va. Km engzatnge ni? Engnge harsatna an tawh tih te ka zawt a, chu chu chhanna kan la hmu lo va.

Khulai khu theihtawp chhuah a kan sorkar hian ngaihtuahna a siam chuan helam hi kal theih loh in lo awm bawh thin mahse hetilaiah hian kan tlan mai dawn a ni. A hnaih pawh a hnai daih zawk a helamah hi chuan. Chu chu rilru tak tak a neih a ngai. Aizawl pumpui mai a ni lo, Mizoram pumpui tana kan problem lian ber zinga pakhat a ni a. Chuvangin, kan UD&PA Minister zahawm tak pawh khan Delhi-ah te kal in hei hi zu chhui vat se la tih kha kan ngen duh a. PWD hotute hruai se la, thil hmuh leh theih mai, divert, a head a kha divert ringawt niin an sawi a. A ziak Chiang tak keiin ka hmu lo a, mahse an sawidan a ni a, a dik tho in ka ring a. Chu chu mutmawh, hnarmawhah lo nei teh se. Helai kan kawngthla a chhiat a, helama kan kal a engkim kan tih theih nan chu chu kan chah duh a ni.

Tin, pakhat lehah chuan Sairanga damdawi in khu an sa dawn a, Health Department lampangin lo hria se kan duh chu, a sakna hmun turah an buai a. A chhakah sa turin an ti a, vantlang, khawtlang tangrualin an duh lo va, a ngaia sak an duh a. Chumi sak an duhna chu tunah hianin thiat kher lovin lehlamah khuan leng maiin an hria a. A building khu a la chhe lutuk lova, kum sawm kum sawmhni pawh la tling lova sak kha ni awm tak a ni a. Helama hi thiat kher lovin a chhakah khan sa mai se la. Tichuan tha takin a building a kha a la awm ang a. Thildang tam takah a la chhawr theih ang a tih ngaihtuahna an nei a. Nimahsela, PWD te hian eng angin nge an ruahman, a lenglo te an ti niawm tak a ni a. A len phawt chuan chu chu vantlang tan a tha a, chu chu pawisa sen tam lohna a ni zawk bawh ang a tih (**SPEAKER** : Hun a tawp der tawh mai).

Pu K. SANGTHUAMA : Pu Speaker, minute khat chiah.. chu chu lo hria se la. Health lampang leh PWD lampang kan chah duh a. Vantlangin-a an against tlat hi chuan a buaithlak a, sak pawh a harsa thin a. Chuvangin, sak theihna a awm an ti a, a sak theih reng chuan lo teh ula, kei pawhin hotute hnenah ka rawn sawi ang a, thil tha ngaihtuah tlan a a tha zawk tur a nih phawt chuan. Amaherawhchu, lenglo chung emaw thalo zawk tur a nih erawh chuan sorkar nawr tlat hi chu thil tha a ni lova ka ti a. Chuvangin, khati laiah khan Sairanga damdawi in sak tur, a sakna lai tura khu PWD leh Health lampang ten chiang taka lo en a ngaihtuahna lo hmang turin tunah hian kan ngen duh bawka a ni e. Pu Chairman, ka lawm e.

CHAIRMAN : Awle, tunah tunge sawi leh ang? Awle, Pu Lalrinawma.

Er. LALRINAWMA : Pu Chairman, ka lawm e. Awle, hei waviinah Budget general discussion te kan han nei leh thei dawn a, a lawmawm hlein ka hria a. Tin, Finance-a thawktute leh kan Minister hnenah pawh lawmthu kan sawi a. Hetianga budget siam hi a hau tak hle dawnin ka ring a. Keini a sawitute chuanin duh lai lai kan sawi a, kan ching a ni mai a, a buaipuitu nih chu a hna a rumin zan khaw tai rek rek an mengin ka ring a. Khangah te pawh khan a thawk hah tute zawng zawng kha lawmthu kan hrilh a ni tih kha ka'n sawi a ni.

Hei tun tum hi kan sum kalphung a dang deuh hlek a, kum dang nena kan ngaihtuah chuan kan budget speech pawh hi a inanglo hlein ka hria nikum leh kumin vel te pawh hi kan ngaihtuah a, a kalphung pawh a danglam a.

Tin, 14th Finance Commission-in an pawisa pek dan turte min tihdanglam sak a. Non-Plan deficit grant-ah leh Devolution of Tax-ah min rawn chhun sak teuh mai a. Lehlamah erawh chuan untie fund a tam dawn ni te pawhin a lang a. Kan thiam zawng takte pawh a ni mai awm mange aw te ka ti deuh rum rum mai a. Engpawhnelangin, hei kan Minister te pawh an zam deuh nge ni helaiah hian a lang tam viau nain chutiang khatiang ti te pawhin an han ziak a.

Amaherawhchu, 13th Finance Commission kal liam ta hi thlir let ta ila, waviina untie fund kan han tih, Non-Plan Deficit grant leh devolution of taxes a min pe tam hi kan vanneih pui ang em aw kan tihna laia a chu, hei hi 13th Finance Commission tawp chiah ni 1.4.2015 a kan dinhmun a ni a ni. Tichuanin, share of tax tel lova min recommend zawng zawng hi vbc.4905.41 a ni a. Tichuanin, an rawn released a hi vbc. 4761 vel an rawn released ta a ni. An rawn release loh hi vbc. 211.77 vel a tling tlat mai a ni. Hei hi tam deuh mai a ni a, a mizopa chhiar dan chuan tluklehdingawn 21 vel a ni, tam tak a ni keini state te atan chuan.

Heng kan hmuh lohna zawng zawng han thlir hian keimahnin tih tur min tuk ve chin conditional nei angah hian kan fail emawni chu aw a tih theih ta a ni. A bik takin heng department LAD chan chungchangah te, Heath-ah te, Forest-ah te, Minor Irrigation-ah te, Education-ah te kan hmulo nasa a ni. Department thenkhatte phei chuan 80% te, 70% te lai kan la chhuak lo a ni, hei hi kan tan a ngai hle a ni. Vawiin hian a pek tawp tawp ang chi Devolution of Tax ang chi te, deficit grant-ah phei chuan 99% deuhthaw kan hmu a kim chiah biklo mahse. 97%, 98% kan hmuh laiin keimahni tha thawh ve tur chinah hian kan hmu chhe lutuk a ni Pu Chairman. Chuvangin, vawiina he finance khawih a a thawktute zawng zawng hian kan inen let a, financial machinery zawng zawng te pawhin tan kan lak a ngai a ni tih hi kan sawi duh a ni. A chhan chu dawn tawp hi chu a awl a, thawh ve hi a ngai a ni vawiinah hian. Chuvangin, Finance Commission-ina a report te pawh kan zir chian a, keinin kan tlin ve dawn em tih atang te pawha kan teh a kan thlir a ngai a ni. Chuti anih loh chuan vawiinah 13th Finance Commission April ni 1 an tawp chiaha vawiina kan dinhmun hi a bik takin conditional-a min pek ho chi-ah hian a lungawithlak ka ti lo a ni Pu Chairman.

Chuvangin, tuna kan sum dinhmun kan thlir a, a lungawithlak teh chiam loh avang hian vawiina 14th Finance Commission ina deficit grant fund-ah kum nga a tan vbc. 12183 a rawn recommend a, tichuan kumin atan vbc.2139 kan hmu ang a, tichuan Devolution of tax-ah hian vbc 18197 kum nga atan kan nei dawn a kumin atan vbc 2670 kan nei dawn a ni. Helai kan finance speech-ah pawh khanin kan sum hnar ber tur a ni tih kha tih kha a sawi dik awm hlein ka hria a.

Tin, specific grant bikah ULB atan chauh a rawn pe a, PRI te hi min rawn pe ta lo ta a ni. Chuvangin Pu Chairman, vawiina Mizoram Finance Commission kan neih ve te pawh kha an report pawh a rawn theh lut tawh a. Khatah khanin PRI ho, a bik takin thingtlang lam kan V/C ho sum dinhmun turte pawh chiang taka ziak langin an rawn chhut chhuak vek a. Chuvangin, khangte pawh kan hman ran theih nan, he finance speech-ah hian Sorkar-in a thlir mek a, a pawm dawn leh dawn loh a la ngaihtuah mek a ni tiin a ziak nghe nghe a ni. Chuvangchuan, kha thil kha ngaihtuah chian ran chi a ni, thingtlang lama kan V/C te dinhmun vawiina an sum leh pai tur ruahmanna bu kha min lo ngaihtuah chian ran sak theih selangin leh a rang lama thutlukna min siamsak turin tih kha vawiin hian ka'n sawi duh bawk a ni.

Tin, hei SDRF-ah te pawh an ti tha, a hmain kan hmu a kan hmu zo vek a ni. Chutiang chuan, SDRF-ah vbc 84 kum nga atan a rawn recomend bawk a ni tih kha kan sawi duh a.

Tin, Annual Finance Statement chungchangah hian lut ta ila, keimahni budget pharh bikah hian. Hei thil mak ang reng deuh mai chu ka va sawisel tum hrim hrimna lam

nilovin Pu Chairman, hei han en ta ilangin 2014 - 2015-a budget estimate, 2015-2016 financial statement-a kan closing balance tur kha kan lo en em aw? En ta ila, budget estimate-ah hian vbc. 602 leh tlem vel hi closing-a pawisa kan neih turah kan han hisap a. Amaherawhchu, revised estimate-ah hian vbc. 639 vel hi deficit-ah a chhuak tlat mai a ni. Chuti chu vbc. 1200 velin kan inhisap sual tihna a nih chu. Kan ngaihtuah thin a financial year khat chhunga vaibelchhia 1200 chuang vela hisap fuhlo tena min enkawl anih chuan a va thlamuanthlak dawn loh e aw kan ti deuh a. Amaherawhchu, chutiang ngawt chu ani dawn emawni chu aw tia han ngaihtuah chian leh deuh chuanin thil pakhat tihsual kan nei a ni. Tichuan hei hi 2014-2015 chhunga kan financial Statement-ah hian Kum 2014-2015 chhunga kan budget estimates hi kan ziak lang thlap a, chu chu tah hian khung luh leh tur a ni. An khung diklo ta a ni, an ziak sual a, an tihual a, hetiang sum ziahna pawimawh lutuk kan han tihual hi chu kan in enlet a ngai khawpin ka hria, Pu Chairman.

Kan Finance hnathawktute pawh an in en let a ngai khawp a ni. Hmanni lawkah kan Finance Minister zahawm takin, a hmasa a vote on account a kan kal nachhan chu kan budget documents te a felfai loh a hlauhawm avang leh chutiang khatiang a ti a, vawiinah a felfai ta chuanglo emawni chu aw ka ti, a lang tlat a ni heti lai ah hian, lo khaikhin ve mah teh u. Nikuma financial statement, 2014-2015-a kan Budget Estimate hi 2015-2016 a Budget Estimate nen hian a inmil tawh lo reng reng a ni. Chuvang chuan, hetiang sum pawimawh lutuk, ramdang pawn an thlir tur kan tih fuhloh lai hi (PU LALSAWTA, MINISTER : Pu Chairman, khawngaih takin, a khawilai takah hian nge, khawi pheh ah hian nge tih kha min hrilh thei se. Kan tihsual chuan siamthat te pawh a ngai ang a), pheh 1-na (Pu LALSAWTA, MINISTER : Pheh 1-na, khawi lai tak hi nge ni) Budget Estimate kha, a hmasa berah actual 2013-2014 a awm ta a, a dawt ah 2014-2015 Budget Estimate a awma. Heta mi Budget Estimate-ah hian Kum 2014-2015 Budget Estimate ami kha, 2015-2016 ah hian a lutawp a ni, kha kha a inkhung fuh ta lova. Chuvangin, kha kha khaikhin chuan thil chiang takin a lang a ni.

Pu LALSAWTA, MINISTER : Pu Chairman, khawngaihin. Khami column hmasa berah khan actuals a rawn sawi a, actuals kha a zat chiah chiah a ni a. Kha minus tur te chu a in minus ve thliah thliah a, chutah chuan Budget Estimate 2014-2015 ah khanin heta a chung ber tiam-a a tlar lina i ti ang, a tlar linaah hian minus in dah lo i tihna a ni em aw.

Er. LALRINAWMA : Pu Chairman, hei Budget Estimate 2014-2015 ah khan, kan opening hi ₹ 3,40,80.00 lakhs a ni a. Tichuan, 2015-2016 AFS- Annual Financial Statement-ah Budget Estimate 2014-2015 a kan opening hi ₹ 85,368 lakhs in a inziak ta a ni, helai hi tihsual niin chu chuan nghawng lian lutuk mai a nei ta a ni.

Pu LALSAWTA, MINISTER : Ngawi rawh aw, Pu Chairman, lawk. Kan thil en hi a inan loh palh chuan kan sawi fuh dawn lova. Hei hi 2015-2016 a nia.

Er. LALRINAWMA : 2015-2016 Annual Financial Statement kha 2014-2015 Annual Financial Statement nen khaikhin a ngai a ni ka tihna a ni a.

Pu LALSAWTA, MINISTER : 2014-2015 kha ka rawn keng hauh lo mai a. 2015-2016 ah khan khawi lai kha nge diklo ta chu aw.

Er. LALRINAWMA : 2015-2016 a diklo ta chu, Budget Estimate a column 2-na chiah, 2014-2015-a opening kha a dik ta lo ta a ni. (Pu LALSAWTA, MINISTER : A opening tih chu, figure hmasa ber) aw, nuai 85,368 a kha a diklo. (PU LALSAWTA, MINISTER : Engnge a dik loh dan chu?) Chu chu nikum kan financial statement kan pharh tawhah hian nuai 3,40,80 a ti, kha kha a lut tur a ni tah hian.

Pu LALSAWTA, MINISTER : Pu Chairman, a complicate em mai a, heti mai chuan kan sawi fel in ka ring lova. A chhan chu estimate hi revised hian a tlangpuin a rawn luahlan thin a. Revised in a rawn luahlan pawh hi, a tak tak kan han thlen hian actual hian a rawn luahlan leh a. Chutianga in luahlan chhawng anih avang chuan revised hi chu ni tura kan theih ang tawk a kan chhut thin. Kha kha a kum leh kumthar ah khan chuanin a lak tlak vak tawh lova, actual hian a rawn luahlan ve thin a. Chungte pawh chu a ni maithei a. Engpawhnise, sawisual palh ka hlau a, i ngaih mawh lai taka kha heti mai chuan hriatthiam pawh a har a, kan member dangte pawhin an hrethiamlo maithei a. Chuvang chuanin, khawngaihin kan tihsual loh nan ziakin, hemi chung lo deuh ah, office-ah te pawh pek theih nise chuan Pu Chairman, thil tihsual hi a tha lova, tihsual loh hram a nih theih nan min venpuina ah chutiang chuan kan ngen teh ang.

Er. LALRINAWMA : Pu Chairman, ka lawm e. Ziakin ka ti dawn nia. Mihring kan nia, tisial thei kan nia. (CHAIRMAN : Nia, ziakin i ti dawn nia, a diklo lai ni a i hriat kha inhrilhfiah ni se. A chhan chu, Budget Estimates a awm a, Actuals a rawn awm leh a, a estimates atanga actuals nena va in compare si, mahse thil inman fuh lo kha a awm thei a).

Pu K.S. THANGA, : Pu Chairman, BE leh Actual kha a inang theilo reng reng a, khalai kha kan lo en ve ang a keini lam pawn. 2014-2015 kan lo en ang a, a kalphungah chuan BE kha chu estimates a ni a, Actual khan a tlangpuiah chuan a rawn danglam ngei ngei dawn a ni. Khalai kha, khami nena compare anih chuan a dik thei dawnlo a ni tih kha kan sawifiah ve lawk a ni.

Er. LALRINAWMA : Pu Chairman, khalai kha. A inang tur pawh a ni lova, amaherawhchu, 2014-2015-a Annual Financial Statement-a Budget Estimate kan dah hi, 2015-2016 ah an rawn highlight leh ta thlap a ni. A inmil tur a ni ta a ni, chu chu a inmil ta love ka tihna mai ania. Engpawhnise, khalai kha chu nakinah ti ta ilangin.

Tichuanin, kan revenue receipt chungchang hi han sawi ta ila. Tax bikah hi chuanin hma kan sawn viauin ka hria a, hei ka lo inzir chiang ve a 2009-2014 thleng khan kan chhut vel a. Actual-ah hianin kan tax hmuh hi 100-a 7.67 velin kan khum thei a. Amaherawhchu, non-tax bika hi kan in en let a ngaiin ka hria. Non-tax ah hianin tun kum 6 kalta, 2008-2009 atanga 2013-2014 ka'n tih lai bika hi chu Actual kan neih vang a ni. 2014-2015, 2015-2016 chu estimate thil anih avangin ka sawi lova. Tichuan, hetah hianin kan revenue receipt, non-tax bikah hianin, kan Budget Estimate, Actual a kan phak lohna hi crore 190 vel zet in kan pha lo a ni.

Tin, mak ve leh deuh mai chu, economic service-ah hianin NLUP, Line Department 9 an lut deuh vek a. Tichuanin, Budget Estimate kan siam reng reng hianin a kum hmasa atangin a kum leh hi kan khum tir tlangpui a ni. Tun economic service a kan non-tax hmuh tura pawh hi kum li kalta, a kum hnih hmalam kha chu kan a, kan phak tir lova. Kum hnih liam ta erawh chu a khum a ni. Amaherawhchu, nikum a kan Budget Estimate hian kumin hi a pha ta tlat lo mai laia hi ngaihtuah a ti thui a, NLUP sawiseltu ten a rah tak tak hi a awm lovang, chutiang khatiang an han ti a, a thenin a ni ang, chutiang khatiang kan han ti a.

Hei hi sawrkar hian a pawm ta mai em maw ni chu aw, kei pheii chuan a pawm ta mai ah ka ngai a, NLUP ah hian rah chhuah hi a tlem dawn tawh ani tih hi. A chhan chu 2014-2015 ah hianin crore 210 vel kan beisei a, kuminah hian crore 183 vel kan beisei a. Crore 26.5 vel in nikum aiin kuminah economic service bik a non-tax a kan beisei hi kan ti tlem tlat a ni. Hei hi ngaihtuah tham tak a ni. Achhanchu NLUP Line Department 9 te Economic Service-ah an lut deuh vek a, chung ho hnathawh chuan awmzia a nei ta lo em ni tih hi vawiinah hian ka sawi duh a ni. BE ah pawh dah pun ve awm tak anih laiin, kan han ti tlem tlat mai hi chuanin NLUP hi chuanin rah chhuah a nei tak tak dawnlo a, hei a awmna bawm puiber pawn nikum pawh a pha tawh lova tih kha kan pawm ta mai em ni aw tih kha Pu Chairman, kan sawi duh a.

Thil mak ve tak a ni, pawisa tam tak kan hmang a, a rah a lo hunah beiseina kan nei chau leh si a, kan finance mithiam, kan Minister thlengin, kan economy titha tur hian Sawrkar hian beiseina a neilo a ni tih lai kha hei hian in rawn pawm taah ka ngai deuh rum rum a nih chu Pu Chairman.

Tichuanin, expenditure thung ah erawh hi chuan, Pu Chairman tlem hun min pek a ngai, min delay nasa si a. (CHAIRMAN : Delay avang khan minute 3 kan paih tel tawh a ni). Pu Chairman, expenditure chungchangah hianin kan inen fimkhur hi a ngaiin ka hria a. Kum 6 kalta 2008-2009 atanga 2013-2014 thleng hian kan Budget Estimate ai a kan Actual tamna hi crore 10,06 vel a tling a ni. Tichuanin, kum 6 chhung vek hianin kan thawhchhuah aia tam pawisa crore 1,262.82 kan hmang a ni sawrkar hian. Chuvangin, kan inenchian hle a ngai a, amaherawhchu, kan sawisel na a, lawmawm deuh awm ve leh chu, capital expenditure ah hian 2013-2014 ah hian 11.2% kan hmang a, 2014-2015 ah 14.86% kan hmang a, kuminah hianin 19.15% ah, kha erawh kha chu a lawmawm viau a ni tih kha kan sawi duh a.

Tin, kan GSDP kan chhut dan hi ngaihtuah tham a tling khawp mai, hei hi kan Finance Minister hian min sawifiah sak se tih hi ka sawi duh bawk a ni. 2014-2015 ah kan GSDP chu crore 9805 ah kan dah laiin, hmanni kan Finance Minister Budget Speech ah khan crore 14,204 kan dah a ni. Kum li kal liamta leh kum thum liam ta a kan GSDP punna chu, 15% velin a ni, kum hnih liam ta leh kum khat liam ta ah khan 10% velin a pung ta a ni. Vawiinah hian 44.86% a pungin kan dah tlat mai a ni. Thil awm thei niin ka ngailo a, eng economy nge kan neih vawiinah hian? GSDP 44.86% a han pung meuh tur hi chuan a rauthla viau emmawnchu aw ka ti a ni vawiinah hian. Thil tak tak a ni dawn em ni? Engangin nge an chhut hetiang ang GSDP hi? Kum khat chhunga 44.86% hi record a tling a, hei hi thil theih a ni em tih kha vawiinah hian ka sawi duh a.

Pu Chairman tlem, kan Finance Minister pawh in nakinah min lo siamsak se. A chhan chu Finance Account kan nei vek a, July thla ah kan dawng vek a, kha tah khanin 2015 – 2016 GSDP Projection pawh a awm a, khatah kha chuan Crore 10818 ah project a ni. Keini chuan vawiina Crore 14204 a kan han project hi chu ngaihtuahna a ti thui hle a ni tih kha ka sawi duh a. Tin, kan leiba pawh a pung chho a, tun dinhmun ah hianin Crore 6260 vel bawr turah ka ngai a.

Kan Consolidated Fund atanga 80.70% bawr vel ah a chho a, engpawhnise K-Deposit pawh ngai turah kan han dah a. Chutiang chuanin kan sum dinhmun a kha a kal a ni a. Pu Chairman, khang kha hmanhmawh deuhin kan sawi a ni e, ka lawm e.

CHAIRMAN (PU JOHN SIAMKUNGA) : Aw le, tunge sawi leh ang le? Pu Mavala (Chalrosanga)

Pu CHALROSANGA : Pu Chairman, vawiina kan Finance Minister zahawm takin Budget a pharh tak sawina hun remchang ka nei hi a lawmawm ka ti a, ka hmaarawn sawi khan arawn sawi technical khawp mai a, a ngaihnawm bawk a, kei chu khati lampang lo deuh hlek khan han sawi ka duh a. Vawiinah hian ram hi a lo thang zel a, suahsualna pawh a pung zel a ni tih kan hre vek a. Chumi kawngah chuan kan Home Department lamte pawh hian hetiang pawh khawihna

lo thleng thin chhui awlsamna atan te hian Aizawl khawchhungah te CCTV an han dah te hi a lawmawm ka ti takzet a.

Hemi bakah hian kan sawrkarin kan lo sawi tawh, Forensic Science Laboratory, Directorate puitlinga hlankai kan tih pawh kha vawiinah hian hma kan la a, Directorate-ah pawh kan hlang kai tawh a, hetah te hian khawl tha tak tak mai Central atangin Mizorama crime kan chhuichhuahna tur equipment tha tak takte kan nei a. Hei hi kan Home Minister hmalakna niin ka hria a, lawmawm ka ti a. Hetiang khawl tha tak tak enkawlna tur hian kan Finance Minister zahawm takin a rawn pharh, Plan Fund nuai 20 hi chu tlemin a beitham deuh hlek lo maw tihna rilru ka nei a, hei hi nakinah kan Minister zahawm tak hian kum dangah duhsak theihna kawngte a awm em tih ka rawn au chhuahpui ve duh a ni.

Tin, Pu Chairman, sports lamah hian sportsman hi chu kan tui khawp a, Mizoram Basketball Association-ah kum 5 lai mai President ka lo ni ve tawh a. Kan Plan Fund hi kan lo ngaithla ve thin a, kan lo en ngawih ngawih zel a. Amaherawhchu vawiinah hian kan Plan Fund hi nikuma 450 atangin 400-ah a rawn tla hniam a, helai pawh hi Sports Association tan chuan a pawh angreng khawp mai. Rawtna pakhat han neih ve ka duh a, a thiang thovin ka hria. Kan hotute khan hmanni lawkah pawh member zahawm takte an zawhnaah khan Labour Cess te awm tih te kan lo hria a, Educational Cess te a lo awm ve a, hetiang te pawh hi Mizoramah hian State Sports Promotional atan hian Cess hi kan la ve thei lo em ni tih hi rilruah hian a awm a. Chuta tan chuan kan petroleum product, HSD leh MS ah te hian sports promotional atan bik liau liau sawrkar hian dan siamin Cess lak theihna kawng hi a awm lawmni tih hi vawiinah hian han sawi ve ka duh a ni.

Vawiinah hian Budget puitling kan pharhna kawngah hian thu lamawm tak tak mai sawitur a awmin ka hria a, a hmasa berah chuan kan MLA Fund chungchangah pawh hian kan MLA Local Area Development Fund atan vaibelchhe 20 ruahhman a ni tawh a. Hei hi a rawn pung nasa ve a ni, kan Finance Minister zahawm tak leh kan Parliamentary Secretary Pu K.S.Thanga chungah a bik tak pawhin lawmthu sawi ka duh a. Kan hotute duhsakna avangin Zenics chairman te ka han ni ve a, mahse nakin lawkah thiah a ni dawn a, chuvang chuan kan MLA Fund a rawn pungte hi keini tan chuan a lawmawm double a ni. Chuvang chuan, an chungah hian lawmthu ka'n sawi leh duh bawka a ni.

Tin, Pu Deputy Speaker, kan Finance Minister huaisen tak mai hian a Budget speech pawh i phalnain ka han chhiar chhuak leh ang a, tax chungchang bikah hian ti hian a rawn sawi a, "Keimahni tax thawhchhuah veah hian a theih chin chinah kan sum hmuh te tipung tura tan lak a ngai reng a, chumi atan chuan Sawrkar pawhin sum hnar awm thei apaing a dap reng a ni" tih hi a ropui ka ti a. Ram mipuite pawh hian vawiina kan hriat atan a pawimawh ka tih chu, chhiah pek hi kan mawh a ni tih hi kan hriat a ngaiin ka hria a. Development kan duh a nih chuan chhiah hi kan pek ve a ngai tlat mai a ni. Chumi kawngah chuan theihtawpin hmun hrang hrangah MLPC ah te, tobacco products-ah te, entry tax leh land revenue-ah te pawh hma kan la chho zel a. Ram tan a tul

a ni tih hriat avanga huaisen taka kan Finance Minister-in hetiang tax a khawnte hi a lawmawm ka ti a. Chuvang chuan ram mipuite pawh hian politics lampanga inchirh thehna mai ni lovin hmasawna kawnga hma kan lakna tur a ni tih hre chung hian huaisen taka a kalna turah pawh hian duhsakna ka hlan ve nghe nghe duh a ni e.

Pu Deputy Speaker, a tawp ber atan chuan, Budget puitling kan neih theihna tura hmalatu kan Finance Minister Pu Lalsawta leh Parliamentary Secretary, Pu K.S.Thanga te leh Finance Officials te zawng zawng chungah hian lawmthu ka sawi duh bawk a ni. Ka lawm e.

DEPUTY SPEAKER : Hun i hmanthiam khawp mai. Le, tunge sawi leh ang le? Sawi duh kan awm tawh lo nge ni? Pu Lalthanliana.

Pu LALTHANLIANA : Pu Deputy Speaker, tawite kan sawi ve ang e. Sawitur a tam viau na in hun kan nei tam lova, sawi ber tur pawh ka hre chiah lo zawk mah mah a. A hmasa in, kan Finance Minister a thawkrim a, a thahnemngaihna a lang a, a dinhmunah ding ila a harsa awm mang e aw ka tia. Sum neih loh nen, nei lo han tih a han tih teh chiam kha a inthlahrunawm dawn bawk nen, a tihpun zel dan tur thahnemngaihna thinlung nen khan an tikual vel dawn a ni tih te kha ka ngaihtuah a, a hahthlak awm mang e aw ka ti a. Rim takin an thawk a hei tha takin an rawn ti chhuak a. Tin, Mizo tawngin kan lo chhiar a, hriatthiam tamtak kan neih phah a Mizo tawnga hetia kan tichhuak hi a lo tha hle mai ka ti a, mahni phak ang tawk tawkin kan han zir a. Thil tam tak kha kan ngaithla tawh a, rilrua lang lian chu sum inrenchemna lampang a ni a. Helama hmalakna leh thahnem ngaihna awka te kan han hria a. A dinhmun ah hian loh theih lohin kan ding si a. Chuvangin, sum kan hmuh belh zelna tur te, tan lak a ngaihna te, state own tax revenue te, state own non-tax revenue chungchang te a rawn sawi a. Chhiah leh chhiah nilo sum hmuhna danglam hrang hrang atanga kan lak a ngaih thu te a rawn sawi hi a dik khawp mai a. Helai a ka chhinchhiah pakhat hi kan sawi duh chu, chhiah te emaw, a nih loh pawhin thil man te kan tihsan chhoh zel emaw a ngai dawn niin a hriat a. Kan tilo theilo a nih pawhin ka rilru a lo awm ve thin chu helaia point-18-na a a sawi, ‘a bik takin tui leh power hman man te hi vawi leh khata a rate ti sang thut lova, kumtin a awm tawk a tihsan zel a tul hle,’ tih tawngkam a hi a tha ka ti a. Hei hi ka vei ve zawng a ni a. A awm tawka hetia tihsan, vawileh khata ti thut lova, kan tisang hret hret ang tihna ziak kan han hmu hi kan piantharna pakhat niin ka hria a, a lawmawm ka ti a. Thinlung rawn deng dawl dawl khawp maia thil man an sang vel te hi chu a buaithlak a, rilru a ti chia a. Hun hi kan nei lo a, kan sawi chiam zel mai a, a tul bawk si a.

Ka zawhna thenkhat chhuak hmanlo te ka ui ve thei viau mai a. IDC chungchang hi kan sawi duh daih a. Municipal Council kalphung duang tur hian Institutional Development Consultancy rawih a ni a. Hei hi municipal kan inthlan hma atang khan rawih tawh niin ka hria a, an ruai rei tawh khawp mai a. Municipal kalphung turte pawh hi engemawchenchu an duang tawh in a rinawm a. Vawiih hian engchen hi nge maw khalaiah khan kan implement tih te, vawiih an la ruai reng bawk si a. A rate phei chu ka hre miah lova.

Tin, kan state sorkar sum inrenchemna nen ka'n sawi pawlh duh zawk zuai a nia, kan state sorkar hian engzatin nge kan rawih pheih chu ka hre chuang lova. Amaherawhchu, kan ruai rei tawh si a, sum kan inrenchem viau dawn anih chuan hengte hi an duan tawh sa, an peih tawh sa te hi kan la hmanglo te a nih pheih chuan a tawh tawh lawm maw ni le? Heng te hi rawih chin dan tawh hi a awm lawm ni insumkar dan tawh hria ila, ruai tawh lo ang ka tihna a ni lova, ka hre chuang lova. Tah hian inrenchem taka a chhunzawm zel dan turte pawh ruahmanna thar te pawh siam a tul em tih te kha ka ngaihtuahna ah a awm a.

Tin, Pu Deputy Speaker, kawngpui PWD chungchangah khan kawng khawi khawi emaw inkalpawhna te siamna tur sum dah kha kan hmu a. Amaherawhchu, khawpui chhung tak tihthawlna tur lampang hi a lang tamlo in ka hria a. Thil dangah khan a lang em aw ka enkim hmanlo a, a lang sar ah chuanin. Vawi tam tak kan sawi thin keipawhin ka rawn sawi fo thin chu Sihpui – Thuampui road kawng te pawh khu kan siam hi a hun tawh lawm mi aw ka ti a. Ramhlun Sports Complex-ah khawthar din a ni a, sawngte saw an han insawn dawn tak tak a nih chuan an tan chakkhai lakna tur kawng tha hi a awmlo a ni. Chuvangin, khawpui tih thawlna tur, traffic jam tih thawlna tur te pawh tih ziaawmna tur te pawh a ni pah fawm si a. A theih ang anga kawng siamthat hna khunglai talte chu tihdan a awm em aw tih te kha ka ngaihtuah a. Ka lo melh ve deuh ran ran a, thil tamtak kar ah khang kha kan sawi duh a.

Tin, MLA fund tihpun a nih kha a lawmawm khawp mai tih kha kan sawi duh baw k a. Tihpun leh zel tur a nih hmeh lehngal a, hengte pawh hi a lawmawm ang reng a. Langtlanga thil kan tih theihna, hna kan thawh theihna a ni a. Kan Finance minister hi thahnem a ngai a, a lawmawm khawp mai tih kha kan sawi duh a.

Tin, kan matching share chungchanga special category state kan nihna min han paihsak tur hi chu a lungchhiatthlak angreng ka ti a. A tak taka a thleng dawn a nih chuan central leh kan state sorkar ina kan intum sem 90:10 tih leh 50:50 han ni tur kha a tak tak hian thlenglo hram se ka ti khawp mai a. A lungngaih thlak dawn hian ka hria a. Hei hi nilo tur atana tanlakna te pawh awm niin a hriat a. Kan lak leh zel te pawh hi a van tha dawn em ve aw ka tia, a tak takin a lungchhiatthlak ka ti a. Kan chhiar kan chhiar a, ka rilru a tibuai a, kan bih kan bih pawh hian 50:50 tur kha chuan 90:10 pawh khan kan harsa a ni. Chumi 50:50 a nih kha chuan a lungchhiatthlak a, tihngaihna a awm dawnlo in kan hre khawp a. Hei private member resolution te pawh a awm dawn in ka hria a. Awm hman se chu pass pawh ka duh khawp mai, ka rilru ah a lian khawp mai a, khang te kha kan sawitel duh a. A manganthlak dawn a, 90:10 ah pawh khan kan kal hlei theilo a nih si chuan tih te kha kan sawi duh a.

Thil tamtak sawitur a awm a, rate chungchang ah te, tin, kan sum lakluh belhna tur chungchang ah te ruahmanna tamtak a awm a, a vaiin kan sawi vek senglo ang a. Tin, sawi pawh kan sawithiam bawklo a. A tlangpui chuan a tha han tih mai loh theih loh kha a ni a. Duhthawh erawh chu a na khawp mai a, tihngaihna vak kha a awm lova, sum hemi tax te; tin, kan state

sorkarin sum a lakluhna tur tihpunna tur chungchang ah hian awareness lampang hi department pawh hian kan uar deuh deuh hi tul in ka hria a.

Kan sawi leh sawi hnu chhiah kan tipung dawn emaw, thil man kan tisang hrim hrim dawn emaw a nih pawh hian mipui ah awareness kan inpek that hi a pawimawh in ka hria a. Chuvang chuan, chutiang lampang ah te chuan tan la ila, kan tang tlang ang a. Kan state in sum harsatna namenlo a tawh chungchang ah te pawh hian a sutkian hna hi kan thawk tlang thei ang a tih kha ka ngaihtuahna ah a awm a. Chungte chu thiamlo takin kan sawi ve a ni e. Ka lawm e.

DEPUTY SPEAKER : E, i sawi thiam khawp mai. Hun pawh i hmang dik e. Le, tunge han sawi ve leh ang le? Aw, Pu R.Vanlalvena

Pu R. VANLALVENA : Pu Deputy Speaker, ka lawm e. Budget sawina hun tha tak kan nei a, Budget hi a har a zir ve ngial mah ila keini ang rual tan chuan zir chhuah thiam a har khawp mai a. Finance minister nih te, Finance a thawktu nih te hi a hrehawm awm mang e ka ti thin. Tun mai nilo, kum rei tawh tak atangin pawisa indaih lai kan nei lova leiba inchhawp chho a, pawisa indaih lo semin kum rei tak hah takin an thawk a.

Kan budget kalphung leh kan hun hman dan zawng zawng han en hian. Kan minister te, a thawktu te hi an hah thin awm hle in ka hria. An mawhphurhna hi hreawm tak a nih ka ring a, keini ang rual chuan nichina ka hmaa member zahawm tak tak ten an sawi tawh ang khan, an siamchhuah sa pawh kan sawisel thiam manglo, kan sawichhuak thiam manglo zawk a ni a. Chuvangin, an thawhrimna te a ropui ka ti a. A bik takin vawiina kan Finance Minister phei hi chu ram vei tak mai a ni tih kan hria a, theihtawp chhuah tak meuh a kan ram siamthat tum mi a ni tih a budget rawn pharh atang pawh hian a lang chiang khawpin ka hria a. Budget pharh atanga lawmawm em em ka rilru la zual pahnih hi a awm a. Pakhatna ah chuan fiscal deficit, kan leiba tih tlakhniam rawn tum dan hi a ropui hle in ka hria a. Kum dang a Budget pawh kan en a, 2011 te, 2012, 2013 ah te chuan 18% te, 7 % ah te a ni a, tunah chuan 0.77 ah tih tlakhniam theih a in beisei a. Chumai ni lo in revenue surplus neih theih hial a in beisei hi a lawmawm khawpin ka hria a. Budget atanga kan en in revenue surplus kha ₹ 1804 crore bawr vel neih theih kan in beisei a ni a. Heng te hi a lawmawm khawpin ka hria a, kan Finance Minister zahawm takin theihtawpa tan a lakna rah a ni.

Chutih rual chuan amah ringawt hi a tawk dawn lo tih a chiang reng a, keini ho helaia awm te leh a bik takin Head of Department te an tan viau a ngai dawn a ni. Kum dang ah pawh revenue surplus neih te, fiscal deficit neih tlem theih te kan in beisei thin na in, a tak tak kan thleng zo thin lo a, chuvangin kan Finance Minister zahawm takin budget a rawn pharh, a rawn dahchhuah a hlawhtlinna tur hi chu keimahni bakah head of department zahawm tak takte kha anni dawn a ni tih a lang a.

State own Tax Revenue hi ₹ 326.56 cror beisei a ni a, Taxation Department hi an ni a, a hlawhtlin theihna tur a pawimawh ber chu. Anni hi kan revenue collect tute anni a chuvangchuan an tan viau hi a ngai dawn a ni. VAT kan lak chungchangah te, entertainment tax kan lak chungchangah te, tun aia nasa leh zual hian tan la se, kan Minister zahawm takin revenue surplus neih a tumna ti hlawhtlingtu tur chu an mahni hi an ni. Chuvangin kan budget atanga a lan dan hian kan state own tax revenue tur hian crore 326. 56 hi kan han beisei a ni a.

Tin, hetiang a pawisa harsa taka kan awm chung chung pawh hian kan sawrkarin mipuite a hmangaihna a lo lang a. Mizo mipui harsa zawk ten buhfai to taka an leina tur khawngaih in a to a kan leisak ang anga kan leitir zel chuan kan mipuite hi an khawngaihthlak lutuk a ni tih changchawiin to lutuk lo in, a leina aia tlawm zawka an lei theihna tur an buatsaih te hi a ropui ka ti a. Hetiang a mipui harsa zawkte hmangaih taka budget a siam hi a lawmawm hle a ni.

Chubakah capital expenditure ro tling siamna tur kha kan member zahawm tak khan lawmthu a rawn sawi tawh a, keipawh lawmawm ka ti a. Kum 2010 ah te, 2011, 2012 , 2013, 2014 ah capital expenditure atana pawisa dah kha a tam hleithei lo a. Vawiina kan budget atanga lo lang kan hmuh ah 19.60% bawr vel capital expenditure atana a rawn dah thei hi a lawmawm tak zet a ni.

Chutiang baw in revenue expenditure tur kan sawrkar hnathawk hlawh leh office enkawlna tur atan 85.71% kum dangah te dah thin a ni a, tunah chuan 80-40% in ti tla hniam thei a; engtin nge a tih zawk aw, ruahhmanna hi a siam zawk aw, ka ti a. Tianga office expenditure te, sawrkar hnathawk hlawh te an ti tla hniam thei hi ruahhmanna fel tak lo neih tawh thin, amah pawhin a sawi fo thin MR lem kan tih thin tlakhniam vak atang te a helaia budget tha lo lang hi niin a lang a, tah pawh khan 2015 a revenue expenditure atan ah 80.40 % velah a rawn tla thla a. Hengte hi a lawmawm khawpin ka hria a, tiang budget tha min present sak tu Minister zahawm tak kan nei hi a lawmawm ka ti a ni.

Finance Minister zahawm tak tana huphurh awm em em tur a ka ngaih leh pakhat leh chu Central Sawrkar inthlak danglam avanga kan financial pattern inthlak thleng hi a ni. Kum danga kan hmuh thin normal central assistance, special central assistance te, special plan assistance thla tin a central atanga pawisa kan hmuh thin zawng zawng kan han hmu thei tawh dawn lo a nih hmel a, hemi tello chung pawh a ruahhmanna tha tak kan Finance Minister zahawm takin a rawn siam chhuak thei hi. Nidanga thlatin a crore tamtak tak kan hmuhna thin ang te tello pawhin min khai chhuak thei dawn niin a lang a, a remhriatna hi a lawmawm ka ti.

Chutihruual chuan keimahni hian theihtawp kan chhuah ve a ngai a ni. Chumi theihtawp kan chhuahna tur zing ami pawimawha ka hriat a chu kan sharing pattern enmil a project kan siam a ngaiin ka hria a. Entirnan, kum hmasa lamah chuan 90:10 te emaw a ni a, a then chu 50:50 te pawh a awm a, 70:30 te, 75:25 te an ni. Central atanga project kan hmuh hrang hrang kan

in tum sem dan a in ang lo a. Tuna kan dinhmun ang 50:50 emaw kan nih dawn chuan eng project hi nge kan ram hian kan lak dawn, eng project hi nge kan bawh dawn tih hi project kan lak hma hian a pattern tur hi ngun taka kan en a tha in ka hria a, pawisa lalut tam minister chak teh nan kan hmang ang tih a hlauhawm in ka hria a.

Pawisa central atanga hai luh hi eng pattern tur nge, state sawrkar hian cheng engzat nge matching share ah kan chawidawn tih hisap rana kan lak a ngai a ni. Chutilochuan kan hmuh ang ang kan lak pawp pawp chuan leiba hi a pung thur thur dawn a, chu chu kan rilru ah a awm a ngai in ka hria a. Chuvangchuan Pu Speaker, kan kal zelna tura pawimawh em em a ka ngaih chu kan sharing pattern en ran a project kan siam a hma kan lak hi a ngaiin ka hria a ni.

Tin, leiba chungchang hi, leibat hi a hrehawm a lei kan ba kan ti a, thenkhat a duhthawh deuh chuan kan leiba zawng zawng hi naupang te ber atanga puitling, upa tak, tar thlengin kan han insem vel thin a. Mizoram population census a mihring zat in kan leiba te kan han sem thin a, helai kan inzirtir dan hi a fuh chiah lo ve in ka hria a. Sum bat hrim hrim hi thil hlauhawm tak a ni lo a, amaherawhchu kan bat dan te hian a zir a ngai a, hlawk zawk leh tha zawka kan hman theihna tura bat a nih hi chuan thil pawl tak ni hian a lang lo. Chutihruah erawh chuan ho lam taka lak a, puk bawrh bawrh erawh chu kan tih tur niin a langlo a, fimkhur taka kan bat erawh chu a ngai a ni. State dang pawh hian an lo ngah ve teh meuh mai a, hei Andhra Pradesh te, Arunachal te, Assam, Gujarat, Nagaland, UP heng ho zawng zawng pawh hian keini ai hian an lo ba hnem tlat mai a, chuvangin State dang lian zawk leh hausawh zawk pawh hian an lo ba nasa ve em em a ni tih kan hriat tel a tulin ka hria a ni. Inchirhthehna ber a hman atan chuan atul ber lo. Nimin lamah khan NLUP pawisa puk chungchang kha sawi a ni a, Samuel T Factory kha ka hriatchian ve tak mai a ni a. Anni khan kan Minister te chhanna atanga kan hriat dan in NLUP atang khan nuai 56 chuang hret loan an la niin ka hria a. Biate-a thingpui khawl siamna tur atan khian a ni a, mipui tan a tha em em a. Chhungkua engmaw zatin eizawn nan an hmang a Mizo thingpui tha tak mai an her chhuak thei a, Mizoram hmun hrang hrangah te man tlawm zawkin tha siin an hralh thei a, a hlawk em em a ni tih kha mipui ten kan hriat a tha in ka hria a. Mizoram state sum atanga remhre tak mai a mimal hnenah mipui in an chhawr theih tur si, thingpui chingtu ten eizawna atana an lo hman theih leh sum lakluhna atana an lo hman theih ni bawk si, thianghlim si, man to bawk si lo a thingpui fe tha tak mai hralh chhuaha a awm theih chhan te kha NLUP sum an puk tir vang a ni tih ka sawi tel duh a ni.

A tawp ber ah chuan Pu Speaker, kan Finance Minister zahawm tak in hetiang ruahmanna fel leh tha tak mai neia budget a rawn pharh hi a lawmawm ka ti a. Kal zelna turah kan ram, kan state, kan sawrkar hian a neih hmasawna tha tak a neih theih ngei ka ring a ni. Ka lawm e.

DEPUTY SPEAKER : Hun i hmang zo chiah a, amaherawhchu a laklawh em a sawi duh la nei la chu ka pek belh ang che ka ti deuh a. Hei minute nga pawh a awm mang lova, midang

tan han ding leh tur khan minute nga chhunga sawi zo thei kan awm chuan a tha tho a, mahse an awm si loh chuan kan chawl hma mai dawn em ni ang, kan chhun chawlh a hun a. A nih leh chawl hma mai ila, dar 2 ah kan thukhawm leh dawn nia.

2 : 00 pm

DEPUTY SPEAKER : Kan sawihona kan chhunzawm leh tawh ang a, chawhma lam khan member 6(paruk) in in sawi hman a, tunge han sawi hmasa leh ang le. Dr. K. Beichhua.

Dr. K. BEICHHUA : Pu Deputy Speaker, ka lawm e. Vawiina kan Finance Minister zahawm takin Budget alo pharh chhuahah hian sawi tur tamtak chu a awmin ka hria a, mahse hun a chep a chutih rual rual chuan kan strick lovang i tih kha ka rilruah ka nei reng dawn tih kha min lo hriat sak la, Pu Deputy Speaker.

Good Governance Mizoram mipuiin kan sawi thin a, kan tuihalna ber niin ka hria a. Chumi nitur chuan thil pawimawh bera ka ngaih chu good financial management kan neih hi No.1-ah a pawimawhin ka hria a ni. Chuvang chuan, kan Finance Minister khan kumin chu year of consolidation-ah a puang a, a pawimawh bera ka ngaih chu financial management kha a tih loh theihin ka hre lova. Kan Finance Minister zahawm takin 2015-2016 Budget a rawn pharh thei hi lawmawm ka ti a, politics a tawn hriat neilo, hriatna tlemte nei tan pheih chuan rilru-in thil tha tamtak duh mah ila solution la hre silo politician junior kan nihna hi a pawu ka ti a.

Vawiina kan budget 2015-2016 hi Mizoram sum leh paia min enkawltu kan Finance Minister zahawm tak leh Department hrang hranga kan hotuteten Mizoram tana tha ber tura an theihna zawng zawng leh an phak tawka an ruahman hi a ropui ka ti a, Finance Minister zahawm tak hnenah pawh lawmthu ka sawi a ni.

Hriatna leh thiamna a tlem nak alaia in bihna hun tur ni hnih te chauh a ni erawh hi chu a pawu ka ti a, mahse phak ang tawk tawkin sawi ka tum ang a. Appropriation Accounts leh State Finance C&AG Report te hi kan bih fo in ka ring a, a hmaa ka lo en ngai loh, a hminga member kan han nih ve taka ka phak ang tawka ka lo zir ve danah chuan Department tam takin mahni sum ruahman aia tam kan hmang fo hi mak ka ti a, chutih rual rual chuan a vengtu tur Department, Accounts & Treasuries kan nei a anni hian engangin nge sum hman dan hi an lo ven thin ang aw tih hi ka rilrua ka in zawhna a ni thin a ni.

Nichina ka sawi tawh ang khan 'Year of consolidation' ah kan puang dawn a, kan annual financial statement leh kan budget speech te pawh kan hre vek a, khami lam kha ka luhchilh lutuk lovang a. 13th Finance Commission kan lo hmang liam ta a, 14th

Finance Commission sum hman dan tur nasa taka thlak danglamin alo awm ta a. Chubakah central sorkar kalphung thar nasa takin alo inthlak bawk nen, Mizoram kan lo tan dan tur hi engangin nge kan hotute hian hma an lak ang tih hi rilruah lian takin a awm thin a.

Kan budget kal tawh leh kan practice hlui te sawi dawn chuan C&AG Report ka phak ang tawka ka lo zir ve atang hian a dik emaw diklo emaw he House-ah hian kan budget eng anga effective ber tura kalpui tur nge ni ang tih hi rilru in a lo dap ve thin a. Chutah chuan Department hrang hranga a duangtute an thahnemngaih leh thahnemngaih lohvah hian kan budget tha leh thalo hi a inngat chiang hle in ka hria a. C&AG Report of India ka zir ve atang hian Department fello, audit apianga in sawifiah hlei theilo laklawh Department kumtin deuh thaw a C&AG Report a awm fo ta mai thin te pawh hi vanduaithlak ka ti hle a ni.

Vawiina kan Zoram dinhmunah chuan State pachhe tak leh State sum lo luh dan nasa taka thlak danglam a nih dawn takah chuan ka rilruah Taxation Department hi lian takin a lo lang a ni. Kan kal tawh chin angah C&AG Report kan han zirah chuan assessment diklo leh felfai lova awm sale tax over concealment tam zia ka hmuhte hian tax hi state-in revenue source lian ber a kan neih tur a ni dawn si a, assessment uluk taka kan neih hi ava tul em ka ti a. Hei hi kan lo kal tawh dan ang ni lova kan kal chhohna tur a insiam that vat emergency-a kan dah hmasak ber tur atana thil pawimawh ber niin ka hria a. Hemi kawngah hian Taxation Minister zahawm tak leh mithiam rual Department amite hian theihtawpin active taka hma an lak hi ava pawimawh dawn em tih hi ka rilruah nasa takin ka lo ngaihtuah thin a ni.

Tin, Pu Deputy Speaker, work department lam sawi tur tamtak a awm bawk a. C&AG Report-a a landan in kumtin contractor-te hnathawk tura rawihnaah hian sorkar-in sum tam tak a hloh thin a, hei hi a zialo hle in ka hre bawk a. CPWD Manual-ah 'hnathawhna atana advance mobilization pek an nih hian interest rate a nei tur a ni' tih a inziah laia interest rate lang miah lova hnathawh tir thin hi mak ka tiin henge hi kan hotute hian siamrem dan a awm chuan year of consolidation kan puan tak si ah chuan ennawn ava tha awm ve tih hi ka rilruah a awm bawk a.

Ram leh sorkar tana kan hmalaknaah hian thahnemngaihna hi a piangsual ta emaw chu aw tih ngawih ngawih tur te pawh hian C&AG Report ka en hian ka hmu thin a ni. CPWD Manual financial power neih-na atana kan hman rual hian sorkar hlawk vena tur section-te pawh hi hman ve zel ava tha dawn em tih kha kan rilruah awm se, chu chu kan hotute pawhin min lo hriatpui se tha in ka hria a. CPWD Manual a kimchanglo kan tih chuan kan state bika work manual hi engatinge kan siam ve mai loh tih hi ka ngaihdan a ni.

Vawiina kan ram dinhmunah Agriculture, Crops Husbandry leh Research & Education kawpa sawi duh tam tak a awm laiin Mizorama kan flagship nodal department a nihna angin vawiina kan NLUP sum tam tak kan hman chhoh tur te pawh, kan hman tawh leh kan la hman zel tur te pawh hi tam tham tak a ni a. Hengah te pawh hian in kaihhraina dan mumal tak, tun aia mumal zawk kan neih a, sum hman dan tur te, puk tir leh puk tir loh chungchang turah te pawh hian felfai deuh hleka dan kan siam hi ava tul dawn em tih hi ka rilruah a awm a, chu chu kan hotuten min hriat sak se ka duh bawka a.

Tin, Horticulture hi Mizoram context-ah chuan ka ngaihtuah thin a, hei aia Mizoram-in State dangte ke pen ruala kan penna tur hmalakna tur hi a awmin ka hre lo a ni. Chuvang chuan, Horticulture hmalaknaah hian tun aia chak zawk leh tun aia kan lo practice tawh te a tha lai te tha zawka kalpui a, a thalo lai ni a kan hriat kha chu hnawl a kan kal hi a pawimawh hlein ka hria. Tin, Animal Husbandry leh Vety hi a pawimawhna lai hi kan hre ve tan dawn chiah niin a lang a Mizoram hian. Hengah te pawh hian chak zawka kut kan thlak a, nasa taka tan kan lak hi a van pawimawh dawn em tih hi ka ngaihtuah bawka a.

Fisheries hi tukin lamah te pawh khan zawhna kan han siam a, a chhanna te pawh kan han ngaithla a. Fisheries ah hian tiang zawng hian ngaihtuah ta ila, kan ramah hian lui tha tak tak kan nei a, hengah te pawh hian tuna Fisheries a sum tam tak kan hmanral te hi kan lui neihsa te a sangha awmte leh sangha chi dang dangte pawh kan lui neihsa ah te pawh hian dah ta ila. Chungte pawh chu a enkawl nan Fisheries Department hian (Power interruption) Pu Deputy Speaker, tuna sum kan hmanna tamtak hi a ven leh enkawl nan hmang maise tihte ka rilruah a awm thin, a tangkai berin ka ring.

Tin, Environment & Forests ah hian, tunlai khawvel ah chuan Global Warming khawvel in a buaipui nasa a. Chutih rual rual chuan keini ramah chuan khuanu relsa felfai taka venhim hi kan tihtur dik tak niin ka hria a. India ramah chuan Forests lama tuna kan sum neih ang angte hi kan Finance Minister in 'Year of consolidation' a puan ang deuh khan, thahnemngai takin a venhim kawngah hian hma la ta ila. Environment & Forests-ah performance tha ber State-ah kan ni thei dawn a ni tih rilrukna te pawh ka nei a.

Minor Irrigation hi sawi leh ta ila. Term hmasa atang khan project neih hi kan nei mang miah lo a ni. Tun term kumhnih kalta ah hian kum 7 deuhthaw engmah project awm manglo in a awm ta a. Kan ram intodelh kan duh a, ei leh bar a kan intodelhna turin Minor Irrigation tello chuan ei leh bar a intodelhna kawngah hian ke kan pen theilo tih kan hre theuh a. Chuvang chuan Minor Irrigation hi tun ai hian thuam chak deuhhleka nise tih kha rilru ah a lian bawka a.

Power & Electricity-ah hian tu sorkar pawh ni ta ila, Election Manifesto-ah hian priority a kan neih Power & Electricity hi a ni thin a. Heng kan hmalakna angah hian khamkhawp awmin ka hre lova. Chuvang chuan, chak zawka he Power & Electricity ah hian hma kan lak hi a pawimawh hle in ka hre bawka a.

Industries Department hi han sawi ta ila. State dangte chuan kawng hrang hrangah Industries Department atanga an sum lakluh hi a tam tih kan hre theuh a. Keini ramah erawh hi chuan Industry hnuai COPU a kum 2 a hminga kan lo awm ve atanga kan experience atangte pawh hian Industry hi ka hmuhdan ah chuan, tu huatthu nilo se, inkhualtelem nan hian kan hmang deuh reuh nge tih theih deuthaw hian kan enkawl dan hi ni tlat in ka hria a. Hengah te hian kan insiamthat hle a pawimawh in ka hria a ni.

Tin, Public Works ah hian, vawiina kan kawng chungchanga inpuhmawhna leh eng engemaw neuh neuh tam tak thil awm angah te pawh hian, tun aia chak zawka a PWD te pawh in hma kan lak theih chuan, kan hotute hian tuna kan dinhmun aia tha hian min siamsak thei ang tih hi anmahni ah hian rinna ka nghat a, tun aia chak leh zuala hma an lak hi a pawimawh hle in ka hre bawka a.

Tin, Health & Family Welfare ah hian, heng Health Services leh Hospital & Medical Education kan tih ang ah te hian ka sawi fo tawh a. Primary Health Centre atang hianin beihpuithlak hian ti ta ila, Mizoram hi India ramah pawh Model State a siamthei tur kan ni tih hi ka hmu chiang viauin ka hria a. Primary Health Centre a thataka kan tih chuan District Hospital rawn thleng tur hi 80% chuan in an escape thei a ni. Chutihlai chuan District Hospital te hi a nihna ang tur anga a Doctor posting angte pawh tha tak nei a kalpui theih ni ta sela chuan District atanga State Capital a rawn kal turte pawh hi kan tlem ka ring a.

Tun kan dinhmunah chuan District atang pawh hian Doctor ten an refer kher loh Aizawl-ah hian kan kal khawm deuh vek mai a ni. Chuvang chuan Aizawl Civil Hospital lo kalte, lo handle tur hian thil harsatak a ni a. Kan Casualty te chu kan hriat theuh angin khum 3 te chauh saw kan nei a, District tin atanga an rawn kal chuan thil complicate deuh mai thawktute tan pawh a ni a. Chuvang chuan, heng thilah te pawh hian tun aia chak zawka hma kan lak te pawh hi a van pawimawh em tih te ka rilru ah a awm a.

School Education leh Higher & Technical ah hian Pu Deputy Speaker, kan hriat angin Human Resources Development hi development zinga thil pawimawh ber a ni a. Tuna kan dinhmun hi kan hre theuh a, heng amalgamation kan tih ang chi te, ka bial lamte phei saw chu Politics vanga transfer leh posting an khawih saw tamtak an awm a.

Hengah te pawh hian fimkhur deuhhlekk in zirilaite piansual tir mai thei kan ni tihte pawh hi inhria a, thahnemngai taka hma kan lak hi a pawimawh hle in ka hria a.

Sports & Youth Services-ah vawiina kan sorkar hmalakna hi a ropui thawkhat viau a. Hmalakna a tha a, a lawmawm a. Chutih rual rual chuan District hrang hranga talent nei tha, thalai tam tak, thingtlang deuh hlek ami thurchhuah dante pawh hi, tun aia chak zawka kan dap hi a pawimawh hle in ka hria a. A bik takin keini Chhimtawp lama awmte saw, kan Minister zahawm tak khan artificial turf phahsak turin Independence Day-ah khan DPR khan min chhawpchuahsak a, WhatsApp-a ka lo hmuh dan chuan DPR, a kawm erawh kha chu Aizawl a ni tlat mai a. Khanglaite kha khawngaihmin min lo enchian sak deuh se, chak deuh hlekin hma min lo laksak thei se, lawmawm hle in ka hria a (DEPUTY SPEAKER : Minutes 5 kan pek belh tawh che a tihtawp tum ve la)

A tawp berah chuan Pu Deputy Speaker, kan ADC pathumte hi Autonomous District Council 3 te hi, tunhma kan tet deuh laia Autonomous District Council kan hmuh leh tuna kan Autonomous District Council te hi a in ang tawh lo hle a ni. Tunah saw chuan kan Autonomous District Council han sawi hian mahni mawngghlim kan an nalai a awm rual rual in, sawilo theilo dinhmunah ka awm in ka hria a. Tuna kan Autonomous District Council-a kan hruaitute min kaihhruai dan saw chu, contractor nge i nih politician ti ta ila, patla hian buk ta ila, contractor an nihna saw a rit zawk daih in ka ring a ni. Chuvangin DCA Minister hian a tul chuan, fa te an thatna tur a nih chuan kut te pawh kan thlak alawm le, kut te pawh a tul chuan min thlak ve hlek se, chu chu kan thatna tur te pawh a nih ka ring a.

Forensic, nichina an rawn sawi tawh ang khan ram sualna leh crime tam tak a awm chho a, hengah hian Forensic tel lo chuan crime detect-te hi thil harsa a ni a. Hengte pawh hi theihtawp chhuah in sorkar hian tun aia chak zawk hian hma min lak sak thei se tih kha ka rawn sawi duh bawk a.

PHE hi ka sawilo thei lova, a chhan chu a tuartu kan ni tlat mai a. Saiha leh Lawngtlai water supply tuna kan tih ang chi kumin March thlaa commission tura kan tih, tun thlenga commission hleihtheih lova la awmte saw, department hian chak zawk in hma min lak sak se, kuminah ngei commission theih tur hian min dah sak thei hram se tih te pawh kha kan han sawi duh a, Pu Deputy Speaker, chungchu ka sawitheih ni mai se, hun min pek belh avangin ka lawm e.

DEPUTY SPEAKER : Tunge han sawi leh ang le. Kan awm tawh lo em ni? Pu Joseph Lalhimpuia.

Pu JOSEPH LALHIMPUA : Pu Deputy Speaker, ka lawm e. Tun Session-ah hun tha deuh mai, vawiinah General Discussion-ah ka'n sawi thei dawn a. Demand sawi hunah hian keini kan dinhmun atan hian han sawi ve vak hi a rem chiah lo bawk si a, zawhna zawt thei chiah bawk si lo, chhang thei bawk si lo, vawiin chu bial lam kan hawi te pawh kha min phalsak turah ka'n ngai a.

A hmasa berah chuan lawmthu ka sawi a. Hei, kan Finance Minister, Planning Minister ni bawk leh a thawhpuite hnenah lawmthu ka sawi a ni. Kan hriatna a tamlo nain India-in zalenna a hmuh hnuah India ram sorkar kalphung leh sum leh pai inrelbawlina, sum leh pai insem dan, Centre, State leh Union Territory-a sem dan an tidanglam nasa hle mai a, transition period-ah kan awm a. Kan hmu dawn em, dawn lo em tih pawh hriat loh a ni. Chutihlai karah chuan hei, budget puitling kan Finance Minister-ina a han buatsaih thei te hi a lawmawm ka ti a. A hautak hle ang tih ka ring a, Budget Speech-a a sawi ang khan rinthu leh tlema dah loh theih lohna lai te pawh a awmin ka ring a.

Hei, kan hriat ve chhun chhun han sawi ila, kumin February thlaa Union Budget Session-ah Finance Minister-in a announce te, chumi hnuah a tukleh lawka Ministry of Finance-in OM a chhuah ang chi te, amaherawhchu, a tak taka hlawhtling leh ta lem lo tunhnuah kan sawi zui luai luai te hi a awm a ni. February thla khan Minister ka puihna department pakhat, Education Department-ah te hian Central/Union Finance Minister khan SSA te, mid-day meal te 100% (centpercent) Central Sorkar-in a fund tawh dawn a ni, a pe tawh dawh a ni a ti a. A tukah Finance Ministry OM a lo chhuak a, chutiang chu a ni dawn a ni tih a rawn chhuak leh a. Kan lawm ve em em a. Chumi hnu lawkah chuan 50-50 tih te a ri leh a. Chuvang chuan, Central Sorkar kalphung hi hriatthiam a har a. Chutianga kan awmlaia keini state revenue leh resources mumal tak neilo tan pheih chuan a harsa leh zualin ka ring a, chutiang chungah budget mumal tak kan Finance Minister-in a present thei hi a lawmawm ka ti a. Amah leh a thawhpuite hnenah lawmthu ka sawi a.

Chutihlaiin, sum leh pai dinhmun harsa taka kan awm laiin kan sorkar, kan Chief Minister zahawm tak kaihhraina leh kan Finance Minister hmalaknate avanga huaisen taka kum tam tak eng ministry mahin an tih hleihtheih loh leh an tih ngam loh te, tunah Corporation te pawh tih tawp turte engemaw zat an lo awm chho a. Tin, sorkar hnathawk Plan hnuaiia mite Non-Plan hnuaiia hlawh la te nikum kum chawhnu lam atangin voter's ID nen an dinhmun tih chian a'n ni te khan sum leh pai tam tak min save mek a, tam tak min save zel dawn tih a langin ka hria a. Hengte hi huaisen ngai tak mai a ni a. Chuvangin, hemi chungchangah pheih chuan kan Chief Minister zahawm tak leh kan Finance Minister zahawm tak hnenah hian lawmthu ka sawi a.

Hei, kan Education Minister-in hma a lakna tamtak zinga pakhat chuan Plan leh Non-Plan hnuaiia chauh ni lo, CSS hnuaiia mite pawh hi voter ID nen engkim submit vek tur a ni a ti a. Tunah hian SSA kan tih te, RMSA kan tih te, Hindi zirtirtu kan tih te, vaibelchhe engemaw zat kan senna hnuaiia thawktute, kan chhawr te voter ID te an han phut chho ve leh tan bawk a. Hengte

hian kan sorkar inrelbawlnaah nasa takin nghawng a nei tha ang tih ka ring a. Chungte pawh chu ka han tarlang belh a ni.

Pu Deputy Speaker, vawiinah hian thil tamtak sawi ka tum lova. Ka sawi tak ang khan bial lamah luh ka duh a. Kan Education Minister, Industry leh Trade & Commerce changtu ni bawk enkawlpui turin kan Chief Minister zahawm takin min ti a, bial lam kan kal zen zen ta lova. Chutihlain, kan bial chhungah hmasawna tamtak kan hmu mek a, kan ngenna te kan hotuten min tihhlawhtlinsak zel a ni tih ka hria a, ka lawm hle a. Vawilekhata peih mai theih a nih loh avangin, chhonzawm ngai a nih avangin vawiinah hian kan Finance Minister zahawm tak hriat atan ka'n sawi lang duh a ni.

Ka bial chhungah sawn Chanmariah hall lian tak mai vaibelchhe nga dawn lai senna tur an sa mek a. Tunah hian vaibelchhe khat aia tam pawisa pawh Finance lamin min pe chhuak tawh a, enkawl hna theihpatawpin PWD te, Sports Department te, Planning Department te pawhin an vil uluk hle a. Mizoramah chuan veng malah hall nei lian berte zinga mi tur a nih ka ring a. Basketball court a awm ang a, hall hnuaiah LMV 40/50 lai park theihna tur a awm bawk a. Tin, basketball khelh loh lain badminton court pathum a leng ang a, mi za sarh (700) dawn lain gallery atangin an thir thei dawn a. Chumi bakah chuan mipa leh hmeichhia sawmnga ve ve, thlen theihna tur room te a la awm zel a. Chutiang zelin table tennis board pali hun theihna tur te hmun ruak a la awm a. Chutiang chu kan bei mek a, tunah sawn kan la zo lova, sawi ang khan vibelchhe khat chuang emaw chu an release tawh a, hmasak tam tak kan la nei a. Hengte hi kan Minister hian min hriatsak se la ka duh a.

Tin, Zobawkah, ka bial chhungah, hei, kan senior a awm ta lova, Pu Sainghaka hunlai atangin, a khawchhuahna a ni bawk a, PHC, Primary Health Centre an lo soal thin a. Rei tak an soal a, an soal hlawhtling hleithe lova. Term hmasa khan kan Chief Minister zahawm tak leh kan Health Minister te leh tuna kan Health Minister kalchhuak ta te thahnemngaihna tunah sawn ruahmanna te an han siam a. Pawisa te pawh min pe chhuak tan tawh a, bul kan la tan chiah lova. Hengte hi hmasak kan la neih a ni a. Hetianga PHC kan neih tur hi kan lawm hle a, amaherawhchu, sum leh pai tamtak ngai leh la enkawl zui ngai a nih avangin kan Finance Minister hian min hriatsak se la ka duh a.

Tin, nichinah zawhna leh chhanna a sawilan ang khan Aizawl khawpui tan cinema hall hlui te pawh sorkarin a lei dawn a ni tih kha kan zavaia kan lawm tlan a ni a. Chutihlaia kan Finance Minister-in min lo hriatsak se la ka tih chu Lunglei khawpui laili takah, Electric Vengah sawn ka bial chhungah YMA-in ram tha tak mai an nei a, bigha khat dawn lai a ni a, square feet phei chuan sing chuang lai a ni a. Kan Finance Minister phei chu a office-ah reilote ka sawipui tawh nghe nghe a, YMA ram a ni a, Electric Veng YMA, sorkarin tangkaia hman a, a chung thenkhat veng tana hall hman tur mamawh a pek theih chuan sorkarin project a siamna atan an donate phal a ni tih hi vawiinah he House zahawm takah hian ka sawi duh a. Bigha khat dawn lai,

hmun laili tak a ni a, Lunglei khawpui tan pawh sorkar building pawimawh leh chhenfakawm tak a sak theihin ka ring a.

Nichin lawk, chawhlawk lai pawh khan an YMA President nen kan inbia a, hetiang sorkarin hma min lak theih chuan khawtlang inhmukhawmna hall lian tak te kan vengin kan neih theih bawk chuan a dang zawng chu sorkar kutah kan hlan phal a ni, min tihsak thei se la kan lawm hle ang, a ti a. Chu chu a bial enkawltu nih piah lamah Lunglei mipui tan te, sorkar tan pawh thil tangkai tur, a thlawna ram zau tak kan neih theihna tur a ni a, chu chu ka han sawi a. Tunah hian project hrang hrang, externally aided project tih te, NLCPR leh NEC bakah loan kan lak theih thenkhatte pawh kan la tifel lo niin ka hria a, hengah te hian sorkar departments tan emaw project lian tak kan neih theih chuan a lawmawm hlein ka ring a, chungte chu ka han sawi ve leh duh a.

Tin, term hmasa khan kan Finance Minister khan hma min laksak a, Lungleiah sawn Account and Treasuries Joint Director Office min hunsak a, a tangkai khawp mai a. Sorkar hnathawk pension te, Lunglei, Lawngtlai leh Saiha District te tan awlsamna nasa tak a thlen a ni a. Engkim tihfel a nih hnuah Aizawl-ah an rawn thawnphei a, a final chauh Aizawl-ah tihfel a ni ta a. Chuvangchuan, kan sorkar hnathawk tamtak an pension hnuah an pension buaipuia Aizawl a rawn kal a, Lawngtlai, Saiha, Lunglei leh hmun dang atanga rawn kal a, office dawra rei tak tak cham a sum leh pai tamtak an khawhral thin kha, Lunglei-ah, a then tan mahni khawhmunah, a then tana hnaivai zawkin tih theih a ni ta a, a lawmawm hle a.

Amaherawhchu, office building an la nei lova, a hmun tur chu an nei fel tawhin ka hria a. Saw saw sak a ngai khawp mai a, Finance Department ta tur a ni ang a, hna hmasaah min neihsak theih chuan a lawmawm khawp ang a. Chungte chu ka'n sawi tel a ni.

A tawp berah chuan, sorkar-in hetiang sum leh pai renchem a, inhrek a, theihpatawpa hna a thawh lai hian mipuite pawh hian hemi kawngah hian kan tawiawm that a ngai hle in ka hria a, chu chu sawi awm ka ni em ka hre lova ka sawi lang duh hrim hrim a ni. Hmanniah kan UD&PA Minister hnenah ka sawi a, Aizawl Municipal kan nih dawn a mipui vantlangin chanchinbuah te leh thil dangah kan sawi tam ber pakhat chu- Municipal kan neih chuan JNNURM pawisa kan hmang thei dawn a, pawisa tamtak a lo lut dawn a, chu chuan infrastructure tamtak kan nei thei dawn a ni tih kha a ni a. Municipal kan nei fel a, JNNURM chu Central Sorkar-in a project a ti tawp ta a, kan hmang rei thei ta chiah lova. Heng municipality-te hi thuneihna insemzaina a ni, people's participation, mipui tam zawk kan thawh ho theihna a ni tih ngaihdan nilova chumi project an haichhuah theihna tur a ni kan tih chuan nakinah a project an thlak chuan harsatna kan la neiin ka ring a. Chumi hunah chuan resources mumal tak kan neih loh phei chuan harsatna tam tak kan nei thei in ka ring a, chuvangin hetiang kan neih theihna tur atan pawh hian mipui lam atanga hetiang kan neih chuan chu chu kan nei thei dawn ti a, a zahve Chiangmanglo sawi ngawt ai chuan,

hei hi nei ila eng nge kan tih ve tur tih te, hei hi nei ila kan ram leh hnam tan a tha angem? tih te pawh hi kan inngaihtuah a tha in ka hria a.

Tin, ka hmaa member zahawm tak khan a sawi a, industry-ah hei kan Minister zahawm tak hovin project hrang hrang bul tanna te kan han nei chho va, hmalakna tam tak a awm a. Amaherawhchu, nichina kan han sawi tak ang khan Central Sorkar-in kan CSS funding tam tak a rawn ti tawp a, a then funding pattern a rawn ti danglam a. Chung zingah chuan Industry-in kan hmuh leh kan hman tam tak kha tih tawp a ni a. Tunah hian project laklawh, pawisa engemaw chen kal tawh bawk si, hmalak tan tawh bawk si kan la zawh chiah loh te pawh engemawzat a awm a ni, chung zingah chuan. Thenzawl te pawh hi Mizoramah kan handloom khawpui a lo ni ta a, lian taka din tumin kan Minister-in theihtawpin hma a la a. Heng project-te hi a funding lo kalna tihtawp lailawk a ni tawh bawk si a, sum lo awm hmasaa hmalak tan laklawh a ni tawh bawk si a. Chutiang chuan Industry Department pawh laklawh deuha a dinlai a ni a. Chuvangchuan, heng kan project laklawh te hi kan Finance Minister hian sum leh paiah harsatna tamtak kan nei chungin min bail chhuah dan te leh heng atanga Mizoram mipuiin hlawkna, revenue tam zawk kan hmuhchhuahna leh kan culture, kan hnamzia, kan puan neihte Mizoram pawna tam zawk kan thawnchhuah theihna tura hma kan lak theihna turin min tihhlawhtlinsak thei se la ka duh hle a. Pu Deputy Speaker, chungte chu ka rawn sawi a, a pumpuiah khan sawi tur tam tak chu a awm na in bial lampang project kha ka ngaihpawimawh leh ka rawn dinchhan deuh chu a nia. Ka lawm e.

DEPUTY SPEAKER : Tunge han sawi veleh ang le? Kan awm tawh lo em ni? Aw, Col. Z.S. Zuala.

Lt. Col. Z.S. ZUALA: Pu Deputy Speaker, ka lawm e. Sawi tur an awm ta meuhlo niin ka ring a chuvangin ka hriat zawng leh ngaihpawimawh sawi ve ka duh a. Tuna kan budget hi a landanah chuan Plan leh Non-plan-te, CSS-te a inchawhpawlh deuh nuai ni awmin ka hria a. Khati a nih chuan, a hmandan pawh kha thiam chuan a economise theih zawk awm mange aw tihna rilru te chu ka nei ve ringawt a.

Tin, hei kan sawi tak angin special category status-te min hlihsak ni awmin a lang a, tin, funding pattern hi 50/50 anga kan kal dawn chuan kan project tamtak hi kan tihtawp emaw a ngai dawn a. Ka hmaa thusawitu pawh khan engemaw chen chu an lo finance tawh, a lai laklawh a han tihtawp leh ngai turte pawh kha a awm dawn niin a lang a. Hengte pawh hi kan inenfiah a, keimahni state a self-sufficient, pawisa tam zawk kan neih theihna tur a kan state chhunga kan tan a ngai hle in ka ring. Chu chu tunhmaa kan pi leh pute pawh khan an thei a, kan lalte pawh khan an khua leh tuite chutiang zawnga an zirtir chu keini pawh hi hetiang lampang hawi zawnga kan inzirtir hi a ngai dawn hle niin ka hria. Chutiang a nih chuan revenue khawilam atangin nge kan hmuh theih ang tih te pawh hi dap a ngai dawn a ni.

Pahnihnaah chuan, kan in economise deuh, kan awm dan pur pur aia hniama kan awm, kan inhrek deuh te pawh a ngai a. Sa chi thum ruaithehnaa kan chhawp thin kha sa chi khat kan theh emaw, vegetarian ruai emaw kan thehte a ngai tawh dawn a ni. Khatiang kha kan ngam a nih chuan kan state chuan kan thei tho chuan ka ring a.

Tin, revenue hmuh theihna tur tha tak tak kan nei a, a langsar zual ni a ka hriat chu hei tunah kan hotute hruainain huaisen takin Excise lampangah a dante kan han tidanglam a. Hetah hian sum tamtak kan hmu thei. Amaherawhchu, sorkar hian hemi sum hmuhna hi amah maiin a ti theilo, public in min support a ngai. Mipui thil hrethiam deuh, understanding nei an ngai. Khuta kan sorkar, NDA sorkar-in kan state min hrek tak siah chuan, han sawi tak zelah chuan bawngsa te pawh hi minrawn tihtawpsak mai thei a, chuvangin kan insanmar deuh a ngai. Kan mipuite, kan kohhrante thleng pawh hian hetiang zu zawrhna veng chhungah kan phallo, chutiang khatiang tih hi a tam lutuk a. Sorkar-in lo pass tawh, mipuiin kan thlan ten a an pass tawh hi chu kan NGO-te leh kan khawtlang hruaitute pawh hian ngaithiam ve se.

Hetianga min support a nih chuan vengchhungah development tam zawk a lo kal thei ang a, revenue tha zawk kan hmuh chuan development kha a chak zawk dawn tih kha a hriat sa reng a. Hetiangah te pawh hian kan inennawn leh chu a tha khawpin ka ring. Kha kha example ka han sawi mai a ni a. Entirnan, ram compensation sorkar-in nasa taka a sen thin hi keimahni kan inenfiah a ngai. Sorkar-in man lovin ram a pe a, pata-te a siamsak a, LSC-te pawh a siamsak a, a hnu reiloteah development na atan sorkar-in a mamawh a, nasa takin sawrkar kha anrawn charge leh a. Hengte pawh hi mi pangngai chuan tihchi a ni lo. Hetiang avang hian pawisa nasa takin sawrkarin a seng a, kan development-in nasa takin a tuar. Hengte pawh hi kan inen tlan a ngai a. Sawrkar chu mipui ta a ni a, mipuite pawh hi sawrkar vek kan ni a, kan tan tlan a ngai.

Tin, sawrkarin huaisen takin PSU restructure-te an ti a, privatization-te hi a ti a, hengte hi a lawmawm a. Hetianga tunhma atanga sawrkarin tanpui ngai reng a, hetiang ang corporation kal hi chu a tih chi loh. Tunah huai takin kan hotuten drastic action an han la ngam hi a lawmawm hle in ka hria a, hei hian nasa takin kan pawisa min save ang.

Tin, hei power tariff hi an report-ah te pawh hian a lang reng a, Mizoramah hian a pe tlem ber kan ni tihte pawh. Hetiang a nih na na na chuan hengte pawh hi kan raise ngam lawm ni, engmah hlauhawm a awm tur a ni lova, hengte hi kan raise thei turah ka ngai a.

Tin, nichinah khan ka hmaa thusawitu kha a bial lampang kha an sawi kai a, sawi kai ve hi ka'n chak deuh hlek a. Entirnan, Zodin hi kan sawrkarin lei a, public utility atana hman a ti a, hei hi a tha ngawtin ka ring. Tunah hian eng atan nge saw hmun saw an hman? Mimalin engtin tin emaw an hman a, a nih tur angin an hmanglo a ni. A hmun remdan leh a dang, heti laia nichina kan UD&PA Minister-in a sawi tawh a, a bul lawkah playground kan nei a, khang hote nena inchawbe a, tangkai taka hman theihna tura an suangtuah a hetiang decision an la hi tha ka ti a.

Hemi pawisa hi tam viauin tunah lang mah se nakin hnuah chuan pawisa hi chu a tlawm thuai dawn. Tin, a hmanna tur leh a revenue kan hmuh let tur kan ngaihtuah khan hei hi thil tha deuh mai a ni dawnin ka hria.

Tin, hetiang deuh bawk hian Mission Veng bazaar saw, hei kan Trade & Commerce Minister kaihhruainain, NEC atangin a sak thatna tur vaibelchhe 5 zet kan hmu a, naktukah hian a foundation pawh kan phum dawn nghe nghe a. Sawtah sawn thil pakhat state sawrkarin a tih a, market tha deuh mai ni thei tur a ni a. Sawmi a panna kawng saw a tha tawklo a, hmun khatah kan nei a. Pawisa nuai 80 vel seng a, mi ram laksak a, awlsam deuh a, hnai deuha kal theihna a awm a. Chu chu biakfel te pawh an ni tawh a. Sawrkar hian hei hi min leisak ngei turah ngaiin kan lo bethlu ve ringawt tawh mai si a, chuvangin, hei hi kan hotute hnenah kan thlen bawk a. Hei hi kan tih chuan Aizawl chhim lampang market saw chu saw sawn a take care dawn a ni. Heti laia kan New Market project lianpui note, khami branch tih ang deuh reuhin, khatiang atan a tangkai em em dawn a. Public, sawti laia a veng hotute leh prominent citizen-te pawhin hei hi an lo thlir ve a ni tih kha ka sawi duh a.

Tin, nichinah khan NLUP loan-te kha kan sawi a. Keima level-ah, kan bial level-ah sawn NLUP kha loan vawk vulhna, free interest loan kha nuai 10 thliah thliahin mi 3 an pe a, saw mite sawn an tihlawhtling em em a ni. Hmanni deuh lawk a Vety-in vawk note an sem turah te pawh, kha mite atang khan an supply tir nghe nghe a. NLUP in hetiang loan a lo pek hi a tha hlein ka hria a. (**DEPUTY SPEAKER** : Minute 10 hun i hmang tawh a, kan la pek belh ang che).

A tawpna chiah, chuvangin, free interest loan an pek kha an ti fuh hlein ka hria. Tin, hetiang kan NLUP leh thildang atana inchwawpchuahna tha takah kan hmang tangkai tih kha ka han sawi duh a ni e. Ka lawm e.

DEPUTY SPEAKER : Midang kan sawm leh hma in, hei general discussion hi naktuk hun a la awm a, chuvang chuan naktukah ka sawi ang tiin kan inkhek deuh em ni aw ka ti a. Naktuk hian general discussion bakah Bill pakhat ngaihtuah tur kan nei dawn a. Tin, naktukah chuan kan sawiho tawpah House Leader, Chief Minister, leh Finance Minister-in a hnu an khar a ngai bawk a, chuvang chuan vawiin ang hian a zalen tawh lo maithei a ni, a chep viau maithei a ni, naktuk chu. Chu chu ka sawi ve ang ti chuan vawiinah hian chuh deuh vat vat a finthlak maithei a ni, a hun takah kan in thuttir lo a. Phar in awm em? Pu John Siamkunga.

Pu JOHN SIAMKUNGA : Pu Deputy Speaker, ka lawm e. Hei vawiin general discussion budget kan han nei a, helai kan neih mekah hian tlem azawng han sawi ve ka duh a. General discussion a nih angin, a bik ang zawng kha chuan mahni bial pawh ka kal rih lo ang a.

Kan sawi duh laia chu, 14th Finance Commission Report anih ang anga pawm an nih takah hian thil kan la tih ngai loh tam tak kan hmu chho ta a ni a. Hemi anih avang hian a tha nge

thalo tih pawh hi hriat a har a. Tunah hian tehkhawnga an han then chhoh danah, 14th Finance Commission angah hi chuan, population based ah 17.5% a lo ni a, helai sum min han pek dan kha; demographic change-ah khan 10% a lo ni a; income distance-ah khan 50%; area location kha 15%, a ni a, forest cover kha 7.5% a lo ni ta a. Hetah hian kumtin mai hian 11% velin, Finance Commission-in a min pek dan ang hi chuan, kum ina min pek hi nakumah chuan 11.9% velin a sang chho dawn a, nakuma kan sum neih tura hi. Khatiang zel khan 11% ang velin kum 2019-2020 thleng hian tih chhoh a ni a, kum 5 chhung khatiang khan nghet takin min lo tihsak a lo ni a. Engemaw avangten spiral inflation-te awm phei se chuan hei hi nghawng tha lo tak nei thei tur ni ten a langin ka hria a.

Chuvangin, he laiah hian untied fund lo tam in, normal tax sharing leh devolutions tih vel atang khan a lo in awinung chho dawn kha a ni a. Chuvangin, tih thiam a ngai ang a, tin, kan sum lakluh lampang tur pawh, tuna kan Finance Minister-in a budget speech-a a rawn tih atangte pawh hian, insan mar a tul zia, a budget speech atangte khan kan hmu a. He budget speech hi a fiahfaiin, a tha em em mai a, han chhiar hian a fiah nghal kuar kuar vek mai a ni. Chumi a nih avang chuan han sawihnawm tur em em awm lovin, helai budget hi engtiangin nge a kal tih laite kha chu han sawi ve lawk ka duh a.

Vawiinah hian kan budget lakluh dan hi, Public Accounts Receipt lam atang hian kan lalut lian ang reng a, 28.75% kan lalut a. Kan Revenue Receipt hi a sang a, 67.22% a nih laiin, kan expenditure lampang turah erawh chuan 83.16 a ni ve thung dawn a ni. Tichuan, kan Capital Receipt hi 4.03% vel a lo ni bawk a, kan pawisa hmuhna lampang zawng kan han chhut hi chuan. Tin, tunah hian kan sawrkar hi a tang nasa hle a ni tih kha a hriat a, chu chu he budget speech-ah hian chiang takin a rawn lang a. Henga kan chhiah, state-in tax kan lo khawn ve vaibelchhe 326 zet hi belhchhahna tur nasa fein he budget hian a zawng a, chumi chu nasa fein kan insan mar a ngai a ni tih a hriat a.

Tin, chutih rualin Non-tax Revenue lamah pawh vaibelchhe 252 kan ngah hi, hei aia nasaa tan a la ngai a ni tih he Budget Speech/Document atang hian kan hmu thei a. Chumi a nih avang chuan State Excise lam atangte pawh hian kan Finance Minister zahawm tak khan 35.68 crores kha kan raise thei turah a ngai a. Tin, tobacco products ho kha a tax-te tihsan a lo nih tak avangin 1.50 crore-ah chho thei tura ngaih a lo ni a. Tin, Mizoram Land Revenue Act awmze neia kan hman chuan 1 crore hi kan la hmuh belh thei ang tih rin a ni bawk a. Stamp duty lam atangin 5 crore hi kan ngah chho thei ang a tih kha a lo lang ta bawk a.

Tin, pawimawh ta em em chu a hma zawng khan professional tax hi 2500 a ni thin a, mahse 14th Finance Commission Recommendation atang hi chuan kan Dan pui article 276-na section 2 kan han siamthat khan ₹ 12000/- ah a kal chho thei dawn a ni. Amaherawhchu, hei hi amendment ngai a ni a, hetiang hian lo kal chho thei ni ta sela Mizorama sorkar hnathawk mi

51601 atang hian, a lo berah vaibelchhe 43-45 hi helaiah hian hmuh theih a ni mai awm mang e aw, tih te kha a ngaihruat theih a.

Tichuan, Professional Tax hi Group 'A' ho kha 100% hi lo pe ni ta se, Group 'B' ho kha 85% pawh lo pe se. Tin, Group 'C' kha 75% te lo pe ta se, Group 'D' kha 50% pawh lo pe se; nasa fein helaiah hian kan in up chho thei dawnin a lang a. Amaherawhchu, central sorkar lampang hi 14th Finance Commission Recommendation a pawm te te a, helam pangah hi chuan a muang leh rih tlat hi chu a pawh khawp a ni. Hei hi rawn che rang deuh nise, keini ang state rethei deuh tan pawh hian sum hnar lian tak awm ve thei tur a ni a. Chu chu vawiinah hian a pawimawh hlein ka hria a.

Tin, inrenchemna lampang hi sorkar hian a keng na hle hian ka hria a, kan hotute an tang a. Hetiang dinhmuna kan din chuan inren a ngai a, sum kan thawhchhuah a ngai bawk a ni tih hriain keini a hminga MLA te pawh hian kan hotute duh dan angin Gas-ah te pawh hian engmah VIP-na kan nei reng reng lo a ni. Hei chu a rei tawh a. Tin, VIP quota kan tih thin buhfai te, chini-te zawng zawng kha kan surrender vek tawh bawk a ni. Khatiang khan inrenchemna lamah pawh kan sorkar hian nasa fein hma a la a ni. Sorkar function chi hrang hrangah pawh kan sorkar hian inrenchemna lampangah pawh nasa fein hma a la a. Tui, bottle te chi chauh hman tawh tur tih te thlengin a ni sorkar hian hma a lak ni. Mipui hmakhaw ngai hian theih tawp hian hma a la a ni tih kha ka'n sawi tel leh duh a.

Tin, tunah hian kan expenditure lampang hi ngun deuha han en hian pension lamah hian kan hmang ve viau a, 7.22 percent kan hmang dawn a. Medical treatment-ah hian vaibelchhe 80 chuang vel a lo lang a, hemi financial statement atang hian. Hei hi ka hriat sual loh chuan kan hotuten state dang pawhin Medical Re-imburement-ah hi chuan natna engemaw deuhhleik bik hi tih a ni thin a. Chumi a nih avang chuan hengte pawh hi kan tifel ang a, Committee-te ruat an ni a. Hengte hi an han work-out hunah chuan nasa fein Medical Re-imburement-ah chuan kan tlahniam hle ang, tih kha an sawi thin a. Tunah hian hma an la mek a nih ka ring a, 80.60 crore lo la lang pawh hi kan hotute hmalaknain a tlem leh thei turah ngai ta ila .

Tin, major works lamah hian vaibelchhe 1045 lai a lo la lang a. Hengah hian budget hi lo lianin lo tam viau mahse kan hmanralna lampang hi awmze neia kal a ngai ve thung a. Heng major works-ah te hian kan budget document-ah tho khan work programme a lo lang a. Khangah khan hmalakna tur tam tak chu a rawn lang a. Thenkhat tha fe fe a awm laiin thenkhat chu tlem chuan ngaihtuah deuh chu a ngai mang e aw han tih deuh chu mahniah hian chuan ka nei ve a.

Tin, minor works-ah te pawh a rawn lang a. Vaibelchhe 221 lai kha minor works-ah pawh tun kan budget atanga hman turah te hian a rawn lang ve bawk a. Chutih laiin kan liabilities hi vaibelchhe 6260 a rawn ni a. Heng kan liabilities te hi a nihna takah chuan kan sum bat hi

internal debt te, public accounts liabilities kan tih mipui sum bawm hrim hrim atanga kan han bat te, loans & advances atangte a lo ni a.

Chuvangin a nihna dik takah chuan 3% GSDP atanga fiscal liabilities phei chu ni tura an tih kha he budget-ah hian kan take care theiin ka hria a, a lawmawm hlein ka hria a ni. Kan GSDP pawh a sang a, hmasawna nasa tak kan nei chho thei turah ngai ila. Ka hriat sual loh chuan GSDP hi keimahni work out niin ka hre lova, central lamin min work out sak niin ka hria a. Khami a nih kha chuan kan state economy hi central lam atang pawn minrawn hmuh san pui ve hle em ni aw, tihna te pawh hi ka nei a. Chuvangin he budget kan sawiho mek hi a tha hlein ka hria a. A hrang hrang han en hian sawifiah pawh ngai lovin kan Finance Minister zahawm takin a lo sawifiah tawh avangin khalai te kha ka'n sawi duh chauh a ni e. Ka lawm e.

DEPUTY SPEAKER : Tunge han sawi ve leh ang le. In awm tawh lo em ni? Naktuk atan kan inkhek deuh em ni aw. Dr.Ngurdingliana i lo sawm ang.

Dr. NGURDINGLIANA : Pu Speaker, ka lawm e. Naktukah ka sawi ang ka ti a, chumi atana ka inbuatsaihna pawh karawn keng lova. Vawiin chu mahni aia thiam zawk tam tak an awm a, anni hnen atangin ka inzir leh phawt ang a naktukah tha deuhin ka present ang ka ti a. Mahse ding duh an awm si lova, ka ding mai aniang chu. Ka sawi tum tam zawk kha Department hrang hrang kha an ni a, member zahawm tak Pu Zodintluanga sawi ang deuh khan Demand sawi hunah sawi tur ka nei lo palh ang tih kha ka'n hre thar leh a, chuvangin Finance Budget pharh atang hian ka'n sawi mai ang e.

A hmasain kan sum funding pattern te, tanpuina lo kal tur te pawh lo kal tawh lo tur a tam zawk a nih hunah hian kan Minister-te leh kan Finance Department Official tan hian a luhai thlak khawpin ka hre mai a. He Budget hi awlsam takin anrawn present thiam a, keini financial management leh a know-how lamah kan tlachham em em nachungin keini tak ngial pawn awlsam takin kan hrethiam a. An inbuatsaihna zawng zawngah lawmawm ka ti takzet a ni.

A budget hmingah hian hming ka phuah duh a, an thluak an sawrbing vang hian 'Budget with a purpose and meaning' ka ti mai a. A chhan chu kan allocation hi a tlem tham si a, chutah sectoral allotment lo pek ngai bawkn enngtin nge anrawn phuahchhuah thiam zawk aw ka ti a. Hemi kawngah hian ka fak takzet a ni. Special Category State nihna min han paih tawh bawkn 90:10 kan han hmuh lai phei te kha chuan hna pawh kan han thawk ve fu a mahse, tunah 50 to 50 a ni leh zui bawkn si nen, chuvang chuan kan sum hman leh kan sum hmuh dan tur te pawh mumal takin tihian anrawn chhawp chhuak thei a, a lawmawm ka ti a.

Tin, kan matching share kan tum tur hi sum tam tawkn kan sen a ngai dawn tih te pawh anrawn hai lang a, project kan siamah pawh hmasawna tak tak ruhrel lo hi chu hmachhawp lo ila tih kha ka'n sawi duh a ni e.

Chuan Revenue Receipt tih te khatiang neuh neuh kha chu kan luh chilh lovang a, amaherawhchu kan sum hmuh theihna tur kan rawn ngaihtuah pakhatnaah chuan kan Mizoram Entry Tax Draft bill te, Mizoram Land Revenue Act 2003 siam danglama land survey te, ram pek dan te, tehfel dan te atanga crore khat kan hmu thei turte leh tin, stamp duty atang te, Registration Act 1908 hnuaiiah Mizoram Registration Rules atanga five crore kan hmu thei tur ringawt pawh hi a lawmawm a.

Tin, nichinah khan member zahawm tak Pu Sangzuala khan a sawi a, power tariff chungchang bikah pheih chuan India hmar chhakah kan hniam lawr lak a. Hei te pawh hi kum tinin vawi leh khatah sang thut lovin kan tui bill te nen tihsan theih zel hi nise. Lehkhabu ka chhiar pakhat ka la hrereng a, mi pakhat Economist kha USA ah a zin a, khawlaiah mi pakhat a hmu a, 'American mi i ni em?' a ti a. 'A, ka ni tho va, mahse, Tax Payer American ka ni' a ti a ni. Chu chu a sawina chhan pawh kha America hmasawmna turah khan a tan kaltlang khan contribution a nei ve tlat, intih tatuna thinlung kha a nei.

Awlsam tein example pakhat kan sawi duh chu, hei kan DM&R Minister-in Silpaulin kan khul chhuah dawn hian pakhat a te chiah cheng sawmnga, a lian chi ah cheng za a rawn ti ta a. Hmanniah thingtlangpa pakhat kan inah a lo kal a, 'Chengza pakhat i chawi belh zel a ngai tawh a ni' ka ti a. 'A ni maw ka pu ka lo chawi anga a ni mai alawm' a ti a. Cheng za min pe a, a hlai chi pakhat ka pe a, an khuaah a haw chuan a phawrh ngam lo reng reng. 'Pawimawh fetah lo chuan ka phawrh dawn lo reng reng' a ti mai. A chhan chu a tha leh sum leh pai seng a, cheng za chawia a hlawh chhuah atanga a lei kha a ni tlat. Chutiang chuan chhiah punna lamah pawh hian kan Minister te inthlahrung lo sela tih kha ka'n sawi duh a ni.

Ka inbuatsaihna a that tehluul nen hmanhmawh deuhvin min sawi tir a, Pu Deputy Speaker, ka ui khawp mai (DEPUTY SPEAKER : I sawi tha nasa a nia, sawi zel rawh). Helamah thil lawmawm em em ka tih chu, ka bial chhungah chuan ka lut dawn lova, waviinah chuan. Helai Fiscal deficit GSDP atanga teh a, 3% aia sang lo ngei turin min beisei a ti a, Minister-in 0.77% nei tura ruahmanna a rawn siam chhuak te hi a ropui ka ti a.

Tin, chumi piah lamah hetah a tawpah khan tihian a rawn ziak leh a, hei hian min hneh khawp mai a. kan chhiar ang e, i phalnain Pu Speaker, 'Kumin Financial Year 2015-16 hi insawhnghehna kum Year of Consolidation ang a kalpui hi kan sorkar tum dan a ni a', a ti a, kum tam tak atanga lo inchhek khawl tawh civil deposit tam tak kan neih mek hi kumin atang hian sum awm thei apiang sawh khawmin kum thum kum li vel chhunga chin fel vek theih beisei a ni, a rawn ti leh a. Tin, revenue surplus te nei thei turin programme a rawn duang a, tin, kan fiscal deposit 0.77 ah kan tlak theih chuan tun atanga kum li ah chuan ani bawh hi la Finance Minister hrih se, a bul atanga hmathar nen programme thar nen hma han lak chu a chakawm khawp mai.

A tawp nan phuiluai deuhvin karawn ti a, naktuka sawi kha ka duh zawk a nia, ka khua a sik mer mer bawksi a, chu chu ka sawi theih tawk ni mai rawh se.

DEPUTY SPEAKER : Demand sawi hunah nitin sawina hun a awm dawn a, tunge han sawi ve leh ang le? Awm tawh lo em ni? Sawi tur kan awm tawh loh chuan ka ti tawp mai dawn a nia, vawiin atan. Tumah kan phar tawh lova, vawiin atan chuan kan duh tawk dawn a ni ang e.

Pu R. ROMAWIA MINISTER : Khatia i tih rau rau chuan naktukah khan kan sawi pawhin 'Chawhma chhungin a sawihona kan khar ang' i tih emaw, tin, chumiah chuan Bill dang hi kan la duh dawn a ti a. Naktukah chuan kan sawiho pawhin minute sawm ti lovin minute nga emaw ti a rel thar tur ang hiala chair atanga thu i neih kha ka'n rawn ngen duh che a ni e

DEPUTY SPEAKER : A hun kha chu naktukah House kan rawn ang a, vawiina hun kan inpek kha chu vawiin atan a ni a, naktukah chuan kan rel tha leh ang a hun chungchang chu. Tin, vawiinah member 11 in kan sawi hman a ni.

Le, kan chawl rih ang a, naktuk ni 13 October, 2015 Thawhlejni zing dar 10:30 ah kan thukhawm leh ang.

Sitting is adjourned.